

ကျွေးပိကပိကျွ

AWIG - AWIG

ကျွေးကလေးအေးအေးရွှေရွှေပိယကျွ

DESA ADAT BANJARSAYAN



ကျွေးကလေးပိမိကျွ

DESA WERDI BHUWANA

ကျွေးကလေးဝေးဝေးကျွ

KECAMATAN MENGWI KABUPATEN BADUNG

ကျွေးကလေးပိမိကျွ

ISAKA WARSA, 1940

2018

NO. REGISTRASI : 189 / 28 / 2018
RAHINA WRASPATI 09 AGUSTUS 2018

NIASA DESA ADAT BANJARSAYAN



KASUKSMAN NIASA DESA ADAT BANJARSAYAN

- (1) Bucu lima tepi sisi nyihnayang Desa Adat Banjarsayan nyungkemin kasuksman panca sradha lan mikukuhin dasar panagara Republik Indonesia "Pancasila".
- (2) Langit mawarna putih pinaka pralambang kasucian miwah nyujur jagadhita santi.
- (3) Warna toya sane makanten pelung pinaka pralambang kalanduhan Desa Adat Banjarsayan.
- (4) Aksara suci Ongkara pinaka pralambang Ida Sanghyang Widhi Wasa mapiteges krama Desa Adat Banjarsayan ngamanggehan Agama Hindu tur satata nyejeran kasukerthan sakala niskala.
- (5) Candi Bentar pinaka pralambang ngajegang tur nyumponin sane kakalih maraga Rwa Bhineda.
- (6) Undag makwehnyane tatiga pinaka pralambang pidabdab Desa Adat Banjarsayan ngamanggehang kasuksman Tri Hita Karana.

- (7) Sekar tunjung sane mawarna kuning pinaka cihna krama Desa Adat Banjarsayan satata mapidabdab nincapang kawruhan lan kasucian.
- (8) Daun tunjung tatiga pinaka niasa kasucian lan katulusan gumanti Desa Adat Banjarsayan kawangun miwah kasungkemin olih tigang Banjar Adat.
- (9) Warna pita barak sane madaging sasuratan “Desa Adat Banjarsayan” pinaka cihna pangiket lan pasikian krama desa adat sane sutindih majeng ring kalajeran utawi kaajegan Desa Adat Banjarsayan.

MOTTO

“SATYAM EVA JAYATE NA NRTAM”

TEGES IPUN :

“WANTAH KASADHUAN JANANE SANE UTTAMA TUR NGAMO LIHANG, BOYA UJAR MADUA UTAWI KADUSTANE”.

BANTANG AWIG-AWIG DESA ADAT
BANJARSAYAN

NIASA DESA ADAT BANJARSAYAN	1
SARA CITA	3
BANTANG AWIG-AWIG DESA ADAT	4
SARGAH PRATAMA ARAN LAN WAWIDANGAN DESA	6
SARGAH KALIH PAMIKUKUH LAN PATITIS	6
SARGAH TIGA SUKERTHA TATA AGAMA/PARHYANGAN	7
Palet 1 Indik Dewa Yajnya.	7
Palet 2 Indik Bhuta Yajnya.	18
Palet 3 Indik Pitra Yajnya.	21
Palet 4 Indik Manusa Yajnya.	28
Palet 5 Indik Resi Yajnya.	29
SARGAH PATPAT SUKERTHA TATA PAWONGAN	30
Palet 1 Indik Krama.	30
Palet 2 Indik Prajuru.	33
Palet 3 Indik Kulkul.	47
Palet 4 Indik Paruman.	48
Palet 5 Indik Padruwen Desa.	50
Palet 6 Indik Panyanggran Banjar.	52
Palet 7 Indik Pawiwahan	53
Palet 8 Indik Santana.	58
Palet 9 Indik Nyapian.	61
Palet 10 Indik Warisan.	66

SARGAH LIMA SUKERTHA TATA PALEMAHAN	68
Palet 1 Indik Karang, Tegal, Carik lan Setra.	68
Palet 2 Indik Setra.	70
Palet 3 Indik Papayonan.	71
Palet 4 Indik Wawangunan.	71
Palet 5 Indik Wawalungan.	72
Palet 6 Karesikan Desa Adat.	74
SARGAH NEMNEM WICARA, BHAYA, DUSTA LAN PAMIDANDA.	75
Palet 1 Indik Wicara.	75
Palet 2 Indik Bhaya lan Dusta.	76
Palet 3 Indik Pamidanda.	79
SARGAH PITU NGUWAH-NGUWUHIN AWIG-AWIG.	82
SARGAH KUTUS SAMAPTA.	83
LEPIHAN.	

SARGAH PRATAMA
ARAN LAN WAWIDANGAN DESA
Pawos 1

- (1) Desa adat puniki mawasta Desa Adat Banjarsayan, Desa Werdhi Bhuwana, Kecamatan Mengwi, Kabupaten Badung, Provinsi Bali;
- (2) Jimbar wawidangan Desa Adat Banjarsayan mawates nyatur inggih punika :
 - ha. Sisi kangin desa adat Baha lan desa adat Dukuh Moncos miwah Banjar Adat Tegalnarungan;
 - na. Sisi kelod margi ka Dukuh Desa Adat Denkayu
 - ca. Sisi kawuh subak Guama, Desa Adat Kekeran miwah Banjar Adat Pekilen;
 - ra. Sisi Kaja subak Apuan Desa Adat Sembung;
- (3) Desa Adat Banjarsayan kawangun olih 3 (tiga) Banjar Adat saha gebogan krama nyane makadi ring sor :
 - ha. Banjar Adat Sayan Delodan makweh krama 102 ayahan;
 - na. Banjar Adat Sayan Baleran makweh krama 144 ayahan;
 - ca. Banjar Adat Binong makweh krama 52 ayahan;Gebogan krama maka sami 298 ayahan;

SARGAH KALIH
PAMIKUKUH LAN PATITIS

Pawos 2

Desa Adat Banjarsayan ngamanggehang pamikukuh makadi ring sor :

- (1) Pancasila;
- (2) UUD. 1945, Pasal 18B;

- (3) Tri Hita Karana manut Agama Hindu;
- (4) Hak Azasi Manusia (HAM);
- (5) Uger-uger saking Guru Wisesa indik desa adat;

Pawos 3

Lwir patitis Desa Adat Banjarsayan makadi ring sor :

- (1) Ngamanggehang Agama Hindu;
- (2) Ngutamayang lan nginggilang prawrettine magama saha sasana manut linggih;
- (3) Ngrajegang kasukerthan desa adat miwah pawongan nyane sakala niskala;
- (4) Ngajegang kasukerthan druwen desa miwah suang-suang krama;
- (5) Ngalestariang dresta, adat, agama lan budaya saha ngutsahayang pamargi manut dharmaning agama miwah dharmaning nagara;
- (6) Ngaraketang pakilitan krama manut ring kasuksman paras-paros-sarpanaya, salunglung sabhayantaka;

SARGAH TIGA

SUKERTHA TATA AGAMA/PARHYANGAN

Palet 1

Indik Desa Yajnya

Pawos 4

- (1) Genah suci utawi parhyangan panyiwian Desa Adat Banjarsayan luir ipun :
 - ha. Pura Kahyangan Tiga (Pura Desa/Bale Agung, Pura Puseh lan Pura Dalem);
 - na. Pura Prajapati ring suang-suang banjar;
 - ca. Pura Dalem Surya, Pura Malanting, Pura Tuwed Puseh, Pura Dalem Alit.

- ra. Pura Sedahan Penyarikan sane magenah ring suang-suang Banjar;
- ka. Pura Batan Bingin sane magenah ring Banjar Sayan Baleran;
- da. Patapakan Ida Ratu Bagus magenah ring Banjar Sayan Baleran;
- ta. Pura Dalem Alit magenah ring Banjar Sayan Delodan;
- sa. Pura Malanting Pasar Taru Mas magenah ring Banjar Sayan Baleran;
- wa. Pura Dauh Pasar Binong magenah ring Banjar Binong;
- la. Pura Puseh Sakti magenah ring Banjar Binong;
- ma. Pura Bukit magenah ring Banjar Sayan Baleran;
- ga. Pura Luhur Nangun Sakti magenah ring Banjar Sayan Baleran;
- ba. Pura Malanting magenah ring Banjar Sayan Baleran;
- nga. Pura Malanting magenah ring Banjar Sayan Delodan;
- pa. Pura Malanting magenah ring Banjar Binong;
- ja. Pura Prajapati magenah ring Banjar Sayan Baleran;
- ya. Pura Prajapati magenah ring Banjar Sayan Delodan;
- nya. Pura Prajapati magenah ring Banjar Binong;
- ha. Pura Panti magenah ring Banjar Sayan Delodan;
- na. Pura Metahun magenah ring Banjar Sayan Delodan;
- ca. Pura Dalem Sari magenah ring Banjar Sayan Delodan;
- ra. Pura Beji Dalem Sari magenah ring Banjar Sayan Delodan;

(2) Piodalan ring suang-suang pura inucap ring ajeng makadi ring sor :

ha. Pura kahyangan tiga :

- 1) Pura Desa/Bale Agung piodalan nyane ring dina Buda Kliwon wuku Dunggulan sane kasanggra olih Desa Adat Banjarsayan;

- 2) Pura Puseh piodannyane ring dina Anggara Kliwon wuku Medhangsia sane kasanggra olih Desa Adat Banjarsayan;
- 3) Pura Dalem piodalannyane ring dina Anggara Kliwon wuku Medhangsia sane kasanggra olih Desa Adat Banjarsayan
- 4) Pura Prajapati sane magenah ring Banjar Sayan Baleran miwah Banjar Sayan Delodan dina piodalannyane ring dina Anggara Kliwon wuku Medhangsia sane kasanggra olih Banjar suangsuang;
- 5) Pura Prajapati sane magenah ring Banjar Binong piodannyane ring dina Saniscara Kliwon wuku Uye kasanggra olih Banjar Binong;

na. Pura panyungsungan Desa Adat Banjarsayan sane tiosan dina piodalannyane makadi ring sor :

- 1) Pura Dalem Surya sane magenah ring Banjar Sayan Baleran piodalannyane ring dina Buda Kliwon wuku Sinta kasanggra olih Desa Adat Banjarsayan;
- 2) Pura Batan Bingin sane magenah ring Banjar Sayan Baleran piodalannyane ring dina Anggara Kliwon wuku Medhangsia kasanggra olih Desa Adat Banjarsayan;
- 3) Patapakan Ida Ratu Bagus sane magenah ring Banjar Sayan Baleran piodalannyane ring dina Buda Kliwon wuku Pahang kasanggra olih Banjar Sayan Baleran miwah Banjar Sayan Delodan;
- 4) Pura Dalem Alit sane magenah ring Banjar Sayan Delodan piodalannyane ring dina Anggara Kliwon Medhangsia kasanggra olih Desa Adat Banjarsayan;

- 5) Pura Malanting Pasar Taru Emas sane magenah ring Banjar Sayan Baleran piodalannyane ring dina Buda Wage wuku Klawu kasangggra olih Desa Adat Banjarsayan;
- 6) Pura Malanting sane magenah ring Banjar Binong piodalannyane ring dina Saniscara Kliwon wuku Uye kasangggra olih Banjar Binong;
- 7) Pura Malanting sane magenah ring Banjar Sayan Baleran piodalannyane ring dina Anggara Kliwon wuku Medhangsia kasangggra olih Banjar Sayan Baleran;
- 8) Pura Malanting sane magenah ring Banjar Sayan Delodan piodalannyane ring dina Anggara Kliwon wuku Medhangsia kasangggra olih Banjar Sayan Delodan;
- 9) Pura Dauh Pasar Binong sane magenah ring Banjar Binong piodalannyane ring dina Buda Wage wuku Ukir kasangggra olih Banjar Binong;
- 10) Pura Puseh Sakti sane magenah ring Banjar Binong piodalannyane ring dina Soma Paing wuku Warigadian kasangggra olih Banjar Binong;
- 11) Pura Bukit sane magenah ring Banjar Sayan Baleran piodalannyane ring dina Saniscara Kliwon wuku Wariga kasangggra olih Pamaksan Pura Bukit;
- 12) Pura Luhur Nangun Sakti sane magenah ring Banjar Sayan Baleran piodalannyane ring dina Anggara Kliwon wuku Medhangsia kasangggra olih Pamaksan Pura Luhur Nangun Sakti;

- 13) Pura Panti sane magenah ring Banjar Sayan Delodan piodalannyane ring dina Saniscara Kliwon wuku Kuningan kasanggra olih Pamaksan Pura Panti;
 - 14) Pura Metahun sane magenah ring Banjar Sayan Delodan piodalannyane ring dina Buda Wage wuku Ukir kasanggra olih Pamaksan Pura Metahun;
 - 15) Pura Dalem Sari sane magenah ring Banjar Sayan Delodan piodannyane ring dina Anggara Kliwon wuku Medhangsia kasanggra olih Pamaksan Pura Dalem Sari;
 - 16) Pura Beji Taman Sari sane magenah ring Banjar Sayan Delodan piodalannyane ring dina Anggara Kliwon wuku Medhangsia kasanggra olih Banjar Sayan Delodan;
- (3) Pangaci ring suang-suang pura panyungsungan desa adat inucap kamargiang manut ring dudonan yajnya nistha, madya lan utama sane kasungkemin ring sajeroning paruman;
 - (4) Krama desa adat Banjarsayan taler ngamargiang utawi ngaturang pangubhakti majeng ring Ida Sanghyang Widhi Wasa miwah prabhawan Ida bhata napkala nemoning rerainan jagat makadi Somaribek, Pagerwesi, salwiring Tumpek, Sugihan Jawa, Sugihan Bali, Galungan, Kuningan, Anggarkasih, Saraswati, Siwalatri, Purnama, Tilem lan rerahinan sane tiosan;

Pawos 5

- (1) Ring suang-suang pura inucap kadegang pamangku;
- (2) Ngadegang pamangku manut dudonan makadi ring sor :
 - ha. Nunas pawuwus ring Widhi utawi nyanjan;
 - na. Ngawilangin saking turunan utawi ngawaris;

- ca. Sangkaning papilihan krama;
 - ra. Rikanjekan ngadegang pamangku patut kadulurin antuk upakara;
- (3) Sang kamanggehang dados pamangku patut pascas ring sasananing pamangku tur teleb ring laksana dharmaning kapamangkuan;
- (4) Tan wenang kadegang pamangku luire :
- ha. Sane ngraksa cedangga makadi :
 - 1) Wong wedangga;
 - 2) Wong kuci angga;
 - 3) Wong taskara;
 - 4) Wong stinesti;
 - 5) Wong gring ila;
 - 6) Wong kusta;
 - 7) Wong nglinggacaya;
 - 8) Wong randhu;
 - 9) Wong ulanjar;
 - 10) Wong babotoh ngulisir;
 - 11) Wong ngambekaken atatayi;
 - 12) Wong dalidra wong keni cor;
 - na. Sang sapasira ugi sane tan kapatutang antuk krama desa manut pararem;
- (5) Prabea ngadegang pamangku desa patut katangganing olih desa adat, sapunika taler prade ring banjar adat patut katangganing olih banjar adat;
- (6) Tiosan ring pamangku desa napkala ngadegang pamangku patut prabeannyane katangganing olih sang sane ngadegang pamangku inucap;
- (7) Pawintenan pamangku desa kamargiang manut pararem;

- (8) Prade wenten kulawarga pamangku kalayu sekaran/lampus ring pakubon pamangku, wenang pamangku inucap nyepuh raga sajeroning tigang dina sasampune pangutangan, mungging prabeannyane kamanggehang manut pararem;
- (9) Kawekas rikalaning pamangku manemu pati, sahilen-ilen muputang sajeroning pitra yajnyan nyane patut kasungkemin olih sang ngadegang pamangku saha kamanggehang manut pararem;

Pawos 6

Swadharmaning Pamangku

- (1) Swadharmaning pamangku makadi ring sor :
 - ha. Nitenin saha nuntun kasucian kahyangan sane kamongin
 - na. Ngenterang upakara-upacara ring kahyangan miwah ring suang-suang pakubon krama;
- (2) Prade wenten krama sane mapanawuran, mungging sarana panawurane sane marupa brana utawi jinah mangda kasadokang ring prajuru desa, wus punika wawu kantebang saha daging panawurane dados druwen desa;
- (3) Pamangku tan kawenangang :
 - ha. Salab-sulub sane ngawinang letih utawi cuntaka, nyolong smara, nyulubin watang miwah sapanunggilan ipun, yan mamurug pamangku inucap patut nyepuh raga antuk prabea ngaraga saha kasaksinin olih prajuru;
 - na. Pamangku nenten keni cuntaka prade pamangku ngayah ring pura, tur wenten kulawarganya lampus ring jerowan, sakewanten pamangku nenten budal salami nenten masuluban budal;

- ca. Yaning silih sinunggil pamangku kacuntakan ritatkala ngaturang aci ring pura amonganya, kengin nyelang pamangku kahyangan desa tiyosan utawi nuwur sang sulinggih;
- (4) Pamangku patut nginutin swadharmaning pamangku manut silakramaning kusumadewa miwah ucap sangkulputih, dharma dresta agama sane kamanggehang;
 - (5) Pasikian pamangku sawidangan Desa Adat Banjarsayan wenang kajegang manut patitis, ngamanggehang swadharma ning pamangku tur ngawerdiang kaweruhan tata sukerthaning pangaci ring kahyangan manut sastra agama;

Pawos 7

Petias utawi paoli-oli-ohan pamangku

Indik petias utawi paoli-oli-ohan pamangku ring desa adat Banjar sayan makadi ring sor :

- (1) Pahan sarin canang ring pura miwah olih-oli-ohan sarin canang/ banten sane kapuputang ring suwang-suwang ungguhan krama desane;
- (2) Pamupon labha carik utawi tegal;
- (3) Luput pakaryan pakraman miwah peson-peson ring among-amongane duaning mangda uleng paayah-ayahane ring kahyangan;
- (4) Polih wastra marupa bhusanan pamangku arangsukan sanis-thane ngawarsa apisan;

Pawos 8

Pamangku kagentosin riantukan :

- (1) Manemu pati;
- (2) Sangkaning pinunas ngaraga;
- (3) Sampun puputing sengker duaning nenten prasida ngayah malih sangkaning yusa;

- (4) Kanorayang olih krama adat sangkaning nilar sasana, malaksana asta dusta utawi duracara tur pamangku sane malaksana kadi punika patut kadanda ngawaliang prabea pawintenan pecak;
- (5) Prade pamangku kawusang sangkaning malaksana asta dusta utawi ngalurug sasaning pamangku, patut keni pamidanda manut pararem saha ngawaliang prabea pawintenan pecak;

Pawos 9

Kasukerthan Kahyangan

Nenten kadadosang ngaranjing sajeroning pura, makadi :

- (1) Sang sane kahanan cuntaka makadi sebel ring raga miwah sangkaning kalayu sekaran;
- (2) Sang katiban cuntaka sangkaning sebel ring raga luih ipun:
 - ha. Sebel-kandel ngarajaswala;
 - na. Sebel sangkaning madruwe putra;
 - ca. Sebel pangantenan;
 - ra. Sebel sangkaning kalayu sekaran;
- (3) Makta sahananing sarana sane ngawinang ngaletihin genah suci;
- (4) Wawalungan suku pat sajawaning pacang anggen upacara mapapada;
- (5) Jadma patita, pianak babinjat rawuhing memennyane sadurung kupakara manut sastra agama, miwah jadma beling sadurung masakapan;
- (6) Yan wenten jadma katapak, karawuhan wenang kapintonin makadi kalamesin antuk toya, katunjel utawi kasuled antuk geni lan sapanunggilan ipun, yan prade belus utawi puwun jadma punika tan wenang kagugonin tur wenang kadanda manut pararem;

- (7) Mabhusana sane tan manut kadi tatacaraning ngaranjing kapura;
- (8) Tan wenang magentos bhusana ring pura yadyapi mayasin pragina, sajabaning pacang ngawentenang sasolahan pamitegep wali;
- (9) Tan kapatutang ngamargiang parikrama matetamban ring sajeroning pura pituwi ring jerowan pura (utama mandhala);
- (10) Sang mamurug kecape ring ajeng keni pamidanda manut pararem saha kadulurin ngamargiang pamrayascita mangda manggeh ring kasucian kahyangan manut sastra agama;
- (11) Wong dura desa utawi sios desa adat Banjarsayan tan kawenangang ngaranjing sajeroning pura sadurung polih wak-wakan saking prajuru;

Pawos 10

Mungghah Tedun ring Palinggih

- (1) Sajawaning pamangku sane ngamong pura inucap lan sane tiosan, tan wenang mungghah tedun ring palinggih kahyangan yan tan polih pituduh saking prajuru desa adat;
- (2) Yan wenten jadma mamurug kadi linging ucap ring ajeng, jadma inucap keni pamidanda ngaturang pamrayascitta agung alit manut pararem;

Pawos 11

Kahyangan Kadhurmanggalan

Sane kabawos kahyangan kahanan kadhurmanggalan makadi ring sor :

- (1) Keni kasamber kilap, katiben/katempuh angin ngalinus tur pungkut miwah sapanunggilan ipun;
- (2) Katunuan utawi kapuwunan;
- (3) Karubuhan taru agung;
- (4) Kalulutan utawi katiben lulut;

- (5) Karanjingan pandung;
- (6) Karanjingan buron agung;

Pawos 12

Kahyangan Kacemeran

Kahyangan kabawos kacemeran makadi ring sor :

- (1) Jadma masalin wastra ring pura sajawaning sang sulinggih miwah pragina wali;
- (2) Jadma masumpah macoran ring pura yan tan sangkaning pituduh prajuru adat;
- (3) Jadma malaksana anguyuh, angising, masanggama, mamisuh, ngawe wyadi, matetangkilan, matetamban, awor paturwanya lanang wadon ring pura;
- (4) Jadma sampun maketus untu makoratan, mawarih ring pura;
- (5) Malalumbaran utawi ngangon ingon-ingon ring pura;
- (6) Karanjingan wong edan;
- (7) Mabhusana tan manut kadi tata caraning ngaranjing kapura;
- (8) Mungguh tedun ring palinggih, ngaturang upakara newek-newek yan tan sangkaning pituduh prajuru utawi pamanguk pura;
- (9) Sang mamurug kadi kecape ring ajeng, keni pamidanda manut pararem;
- (10) Kahyangan kasiratang dening rah manusa;
- (11) Krama sane manggihin praciri indik kahyangan kahanan kadhurmanggalan miwah praciri kahyangan kacemeran makadi ring ajeng patut digelis atur supeksa majeng ring prajuru desa, dumugi digelis prasida katitenin mangda sampunang ngantos suwe kamargiang pamrayascitta;

Palet 2
Indik Bhuta Yajnya
Pawos 13

- (1) Bhuta yajnya inggih punika upakara-upacara yajnya sane marupa byakala katur ring prathiwi lan kahyangan, sarwa prani miwah upakara-upacara katur ring bhuta kala;
- (2) Bhuta yajnya punika ketah kabawos macaru;
- (3) Pacaruan inucap kamargiang nista, madya, utama manut kawigunan nyane sane madudonan makadi ring sor :
 - ha. Ekasata;
 - na. Pancasata;
 - ca. Pancasanak;
 - ra. Pancakelud;
 - ka. Resigana;
 - da. Baliksumpah;
 - ta. Tawur Agung;
- (4) Upakara-upacara sane katurang majeng ring sarwa prani kamargiang ritatkala :
 - ha. Majeng ring sarwa tumuh kalaksanayang kala dina Saniscara Kliwon wuku Wariga sane ketah kabawos tumpek wariga utawi tumpek pangatag;
 - na. Majeng ring sarwa ingon-ingon kalaksanayang kala dina Saniscara Kliwon wuku Uye sane ketah kabawos Tumpek Kandang
- (5) Manut dresta sawawoning upacara kadi ring ajeng taler ring Desa Adat Banjarsayankamargiang upacara majot-jotan utawi yajnya sesa, ritatkala sasampune wusan maratengan nyabran dina sane taler kabawos banten tugu;

- (6) Macaru taler kamargiang napkala pacang nyanggra karya utawi yajnya ring kahyangan suci sane kabawos masapuh-sapuh duaning pacang nyanggra dina piodalan ring pura miwah genah suci sane tiosan

Pawos 14

Tawur Kasanga

- (1) Pacaruan ring dina tileming kasanga, nista, madya lan utama manut ungguhan kamargiang ngawarsa napkala pacang nyanggra Isaka warsa anyar sane kawastaning tawur kasanga;
- (2) Pamargine magenah ring Pura Bale Agung miwah ring pempatan agung sane mawasta catus patha;
- (3) Nyanggra dina nyepi dudonan ipun makadi ring sor :
- ha. Prade nentn wenten pawilangan tios, tigang dina sadurung panyepian kamargiang pamelisan (malasti) inggih punika sahananing pralinggalan Ida Bhatara kabuat kairingan malelasti kasagara utawi kagenah pabejian, wus punika Ida Bhatara nyejer ring Bale Agung;
 - na. Benjangne Ida Bhatara kantun nyejer ring Bale Agung katuran pararesikan lan ayaban sakasidan nyane;
 - ca. Ring dina pangrupukan sasampune kamargiang pacaruan miwah sailenya wawu Ida Bhatara kawaliang kapayoganya sowang-sowang;
 - ra. Nepek ring dina tileming sasih kasanga kamargiang catur brata panyepian sane madudonan makadi ring sor :
 - 1) Amati Geni inggih punika tan kengin maapi-api pamekas geni sane wenten ring sajeroning angga sarira sane mapituas ring kawisayan indriyane;

- 2) Amati Karya inggih punika tan kengin nyambut karya pamekas prasida ngamargiang tapa, yoga miwah samadi;
 - 3) Amati Lelungayan inggih punika nenten kadadosang maleluasan sajawaning pecalang miwah prajuru dumogi prasida ngardi katreptian ring desa adat;
 - 4) Amati Lelunguan inggih punika nenten kadadosang maseneng-seneng dumogi kasidan ring sajeroning mulat sarira;
- (4) Catur brata panyepian punika patut kamargiang ngawit semeng ring dina panyepian punika rawuh kabanjangne risampune kasuarayang kulkul pangembak geni;
 - (5) Ring dina pangembak geni sasampune prasida ngamargiang catur brata panyepian patut kalanturang antuk pidabdab sane mapituas pada ngaksama sareng sameton krama sane kawastanin madharma santi;
 - (6) Prade wenten rikanjekan dina panyepian nepek ring pamargin catur brata panyepian raris wenten silih sinunggil krama utawi ring desa adat ngamargiang piodalan ring pura, sanggah, marajan, bilih-bilih wenten sinunggil krama sane kalayu sekaran, ngembasang putra, sungkan, rare durung mayusa tigang sasih lan sapanunggilan ipun, patut masadok ring prajuru utawi sane kawenangang manut pararem, prajuru kawenangang ngamedalang ilikita (ijin), pinaka pracihna kadadosang ngangge suar utawi suluh sane sunaran ipun nenten makanten saking margi;
 - (7) Sang sapa sira ugi sane mamurug keni pamidanda manut pararem;

Palet 3
Indik Pitra Yajnya
Pawos 15

Pamargin upacara pitra yajnya ring Desa Adat Banjarsayan madudonan makadi ring sor :

- (1) Mapendem utawi mageseng sakalwirnyane makingsan ring prethiwi utawi ring geni patut saha kadulurin mapangentas;
- (2) Atiwa-tiwa (pangabenan) manut bacakan panca atma pratistha, widhi sastra miwah sane sewosan;
- (3) Risampun puput ngamargiang atiwa-tiwa kadi ring ajeng, upacara salantur ipun kalaksanayang pangrorasan/ nyekah / mamukur (mapanileman), maligya manut kabuatan suwang-suwang, tur sasampune ngamargiang mendak nuntun wawu kalanturang antuk ngalinggihang dewa hyang;
- (4) Jadma lampus sane patut kupacara pangabenan inggih punika jadma sane sampun maketus untu, prade durung, patut kaklungahang;
- (5) Rare embas sadurung mayusa abulan pitung dina prade lampus patut kamargiang upacara ngalangkir;

Pawos 16

Swadharmaning sang kahanan kalayu sekaran makadi ring sor :

- (1) Sang madruwe kapatian patut masadok ring prajuru banjar nguningayang pamargine pacang ngupapira sang nemu pati saha pacang migunayang setra;
- (2) Swadharmaning banjar patut nyuarayang kulkul petau manut suaran kulkul sane sampun kasungkeming makadi kulkul wenten krama sane lampus;
- (3) Panyanggran banjare salantur ipun makadi ring sor :
ha. Suang-suang krama patut nedunang papatusan manut pararem;

- na. Krama banjar lanang istri patut ngamargiang kasalulungan mapitulung ngaromba pakaryan sang madruwe kaptian sajeroning ngupapira sang lampus manut dresta
 - ca. Ngawit saking nedunang pangawak sang lampus ring bale adate rawuh kamagulung/maringkes miwah pangutangan nenten kaptatang mabasah-basah, maguyang (magarap), prade mamurug sang malaksana patut mrayascitta desa utawi banjar manut pararem;
 - ra. Panguing panyanggran banjare napkala makarya eteh-ete sawa rawuh kapangutangan mangda kanutang ring kawentenan sang madruwe kaptian (sakasidannyane);
 - ka. Krama banjar ngater sawa kasetra utawi genah pamuwunan kadulurin makakidungan pamargine dab-dabalon saha mabusana adat, trepti manut makadi dresta, adat, agama lan budaya Baline pamekas ring sima loka dresta Desa Adat Banjarsayan;
- (4) Prade ring suang-suang banjar adat wenten silih sinunggil krama sane lampus, napkala pacang ngupapira sang lampus punika kacunduk ring dina larangan-larangan indik patiwatwan sane manggeh ring Desa Adat Banjarsayan, pamargine patut nginutin :
- ha. Prade mapendem pamargine patut sasingidan lan nenten mapangentas tur nenten nyuarayang kulkul;
 - na. Prade pacang ngamargiang patiwatwan patut ngimpasin larangan desa tur kengin kasetra tiosan manut sulur lan pangunadikan prajuru sane sampun saheloan ring sang madruwe kaptian;
 - ca. Kacuntakan desa adat patut kamanggala antuk suaran kulkul tur manut ring uger-uger cuntaka sane manggeh ring Desa Adat Banjarsayan;

- ra. Krama adat napkala katiben kapatian mangda satinut lan nginggilang uger-uger desa adat tur nyungkemin kasu-kerthan miwah dresta sane manggeh ring desa adat Banjarsayan dumogi pakilitan krama lan adat miwah dresta sane mamargi ring desa adat Banjarsayan ajeg rawuh kapungkur wekas;

Pawos 17

Indik Cuntaka

- (1) Sane kasinanggeh kacuntakan sakadi ring sor :
- ha. cuntaka sangkaning kalayu sekaran utawi lampus;
 - na. Cuntaka sangkaning madruwe putra;
 - ca. Cuntaka sangkaning ngrajaswala;
 - ra. Cuntaka sangkaning karuron;
 - ka. Cuntaka sangkaning pawiwahan;
 - da. Cuntaka sangkaning gamia-gamana;
 - ta. Cuntaka sangkaning salah timpal;
 - sa. Cuntaka sangkaning prade anak istrri mobot(beling) nenten ngamargiang pawiwahan;

 - wa. Cuntaka sangkaning mamitra ngalang;
 - la. Cuntaka sangkaning wenten anak istri ngembasang putra sadurung kupakara pabyakawonan saha widhi-widhana;
- (2) Sengker cuntaka manut ring kawentenanya makadi ring sor :
- ha. Cuntaka sangkaning kalayu sekaran cuntakanya ngantos kamargiang upacara masapuh-sapuh manut dresta;

 - na. Cuntaka sangkaning ngrajaswala suwenyane 3 dina ngawit saking ngrajaswala utawi salaming ngrajaswala;

- ca. Cuntaka sangkaning ngembasang putra salami 42 dina ngawit saking putrane embas utawi ngantos sasampun kamargiang upacara makambuhan tur maprayascitta manut agama, lanang lan istri saha putrane;
- ra. Cuntaka sangkaning karuron suwenyane 42 dina saha sampun maprayascitta;
- ka. Cuntaka sangkaning pawiwahan cuntakanya ngantos sasampun kamargiang upacara pabyakala saha mawidhi widhana;
- da. Cuntaka sangkaning gamia-gamana cuntakanya ngantos sasampune kapalasan saha sampun maprayascitta raga rawuhing desa adat miwah kahyangan desa;
- ta. Cuntaka sangkaning salah timpal kapuputang makadi pangajah agama Hindu tur dresta miwah adat sane manggeh;
- sa. Cuntaka sangkaning anak istri mobot(beling) durung mawiwaha suwenyane cuntaka ngantos kamargiang pawiwahan;
- wa. Cuntaka sangkaning mamitra ngalang suwenyane ngantos kawentenang pawiwahan;
- la. Cuntaka ngembasang putra tan pawidhi widhanan, suwen nyane ngantos wenten putrane mameras saha sampun kawentenang upacara manut sastra agama;

(3) Cuntaka sangkaning kalayu sekaran utawi sangkaning wenten sane lampus makadi ring sor :

ha. Mapendem cuntakanyane :

- 1) Cuntakan banjar 3 dina madasar tengeran suaran kulkul utawi sasampune masapuh-sapuh;
- 2) Kulawarga sane madruwe sang lampus suwen nyane 12 dina;

na. **Atiwa-tiwa utawi pangabenan cuntakanya :**

- 1) Sebel banjar suwennyane 3 dina manut dresta;
- 2) Sang nyambut karya utawi sane madruwe kapatutan sang lampus cuntaka ngawit saking ngrancana karya (mapangalang sasih) rawuh sasampune huwus yajnyanya (mapegat) miwah masesapuh;

(4) **Tan keneng cuntaka luire :**

- ha. Sang sulinggih lan pamangku kahyangan tiga;
- na. Rikala piodalan ring kahyangan;
- ca. Bandesa adat miwah Kelian Adat;

Pawos 18

(1) **Atiwa-tiwa utawi pangabenan kamargiang antuk :**

- ha. Sawa prateka inggih punika ngupapira sawa utawi raga sarira sang lampus;
- na. Sawa resi inggih punika ngupapira sawa karesian sane marupa awak-awakan sang lampus duaning nenten kadadosang makta tawulaning manusa kagraha mapuara leteh graha miwah desa adat inucap;

(2) **Panumaya pangabenan wenten 2 (kalih) soroh luih ipun :**

- ha. Ngaben dadakan (bah-bangun);
- na. Ngaben ngamasa;

(3) **Dudonan pangabenan ngawit saking ngagah, ngeseng ngantos pangiriman utawi nganyut;**

Pawos 19

(1) **Papatusan pangabenan wenten kalih soroh luire:**

- ha. Ngaben ngamasa patusnyane manut dresta miwah pararem banjar suang-suang;

- na. Ngaben dadakan patusnyane pateh makadi patus padem mapendem lan kanutang ring dresta suang-suang banjar;
- (2) Upacara Pitra Yajnya sajangkepyane ring desa adat Banjarsayan kamargiang mabantang antuk awig-awig desa adat tur panglaksanaan nyane kamanggehang miwah kalaksanayang manut drestan banjar adat suang-suang sane katitenin sajeroning pararem banjar;
- (3) Krama adat desa adat Banjarsayan patut nginggilang adat-istiadat lan agama Hindu sane sampun katami saking kaluhuran tur mautsaha nincapang sajeroning panglaksana dumogi prasida ngamangguhang kasukerthan miwah karahayuan sakala niskala;
- (4) Sahananin pidabdab miwah usaha desa adat sane sampun kamanggehang ring sajeroning awig-awig, pararem miwah pasuara desa, prade pungkuran kapikahyunin pacang ngardi pakeweh utawi pabaat majeng ring krama adat, patut katitenin malih tur mungguhing ring sajeroning pararem pamekas sane mapakilitan ring pamargin pitra yajnya;

Pawos 20

Mendem utawi Ngeseng

- (1) Patut nganutin padewasan miwah tan kawenangan mendem utawi ngeseng sawa nuju dina semut sadulur, kala gotongan, purwani, purnama, tilem, nyandung, makirim wangke, ngutang tiga sapisan ring setra tunggal, rerahinan jagat, nemoning dina piodalan lan Ida Bhatara kantun nyejer ring kahyangan miwah larangan desa sane siosan manut dresta ;
- (2) Tan keni larangan tur tan dados inepang luih ipun :
- ha. Anak alit sadurung maketus lampus patut digelis kaupapira;
- na. Sang keni sungkan ila miwah ngalalah utawi sane mawabah;

- ca. Sawa ngadut rare patut kabasah (rare kamedalang mawiwit oprasi) wawu pendem;
- (3) Yan wenten makutang sajeroning desa adat pamarginnyane patut sane pinih tampek ring setra mamargi rihinan, nenten dados sane pungkuran ngalanggar sane pinih tampek ring setra;
 - (4) Yan wenten krama tios manawi krama tamiu prade nanem utawi ngeseng sawa ring setra desa adat Banjarsayan patut polih wak-wakan saking prajuru desa tur keni pananjung batu agung alit ipun manut pararem;
 - (5) Jadma sane nenten magama Hindu nenten kadadosang nanem utawi nganggen setra desa adat Banjarsayan;
 - (6) Prade wenten sane mamurug patut keni pamidanda manut pararem;

Pawos 21

Sukerthaning Setra

- (1) Ritatkala ngendagin ring setra nenten dados makta tanah setra kadesa adat;
- (2) Tan wenang makarya undung-undung (rumah kubur) sane permanen ring wewidangan palemahan setra desa adat Banjarsayan;
- (3) Tan wenang nginepang bangbang;
- (4) Tan kadadosang nanem utawi ngutang sawa tiga sapisan ring setra tunggal;
- (5) Tan kadadosang makirim wangke miwah makutang ngarahina ring setra desa adat Banjarsayan;
- (6) Tan kadadosang ngutang sawa masengker 7 (pitung) dina sadurung piodalan utawi karya ring pura kahyangan desa lan 5 (lima) dina sadurung nyineb ring paumahan, griya silih sinunggil krama desa;

- (7) Tan wenang nyekeh sawa langkungan ring 7 (pitu) dina prade nenten kabenang, sajabaning alang padewasan, prade pacang kabenang tan kawenang nyekeh sawa langkungan ring amasa;
- (8) Sawaning rare tan ngetang padewasan miwah tan kadadosang nyekeh sawaning rare;

Pawos 22

- (1) Indik sang lampus sangkaning ngulahpati miwah salahpati kasuk- serah ring sang tri manggalaning yajamana makadi sang sane nruwenang kapatutan (karya), prajuru desa utawi krama, sang sane ngajengin indik yajnya miwah sang sane pacang dados pamuput yajnya inucap, yan sami sampun nyungkemin pacang kabenang, prade kapikahyunin pamargine nenten patut, mangda kanutang ring sastra agama Hindu;
- (2) Pamargin pitra yajnya sajangkepnyane kalaksanayang mabantang antuk awig-awig desa adat Banjarsayan lan panglaksanaan nyane kamanggehang tur kamargiang manut dresta ring banjar suang-suang sane wenten ring wawidangan desa adat Banjarsayan;

Palet 4

Indik Manusa Yajnya

Pawos 23

- (1) Manusa yajnya inggih punika upakara-upacara dharmaning manusa ngawit saking kamargiang dharmaning mapawarangan ngantos kamargiang upacara pawintenan;
- (2) Upacara manusa yajnya inucap madudonan makadi ring sor :
 - ha. Magedong-gedongan kamargiang rikala bobotane sampun mayusa 6 sasih;
 - na. Upacara rare medal, embas (lekad rare);
 - ca. Kepus udel;

- ra. Rare mayusa roras dina;
 - ka. Upacara makambuhan (42 dina);
 - da. Tigang sasih (telubulan);
 - ta. Pawetonan/pawetuan (6 sasih);
 - sa. Tutug kelih (ngraja wadone lan ngembakin lanange);
 - wa. Matatah utawi mapandes;
 - la. Mawiwaha;
 - ma. Mawinten;
- (3) Upakara-upacara inucap nista, madhya lan utama manut sastra agama lan catur dresta, maka buatan desa dresta sane ngawinang sima cara desa;
 - (4) Napkala pacang ngarencanayang karya upacara manusa yajnya sane muatang pitulung ring krama banjar patut pasadok punika 3 (tiga) dina sadurung pangambilan karya upacara punika kalaksanayang saha sang sane kaulemin patut matatulung sapatutnyane;

Palet 5

Indik Resi Yajnya

Pawos 24

- (1) Sang pacang madeg sulinggih (pandita) utawi sane kabawos sadaka patut masadok ring prajuru desa kalih Parisadha Hindu Dharma;
- (2) Prajuru desa patut nitenin tur wenang mapatinget prade sang calon sulinggih wenten kacihna lempas ring parilaksana miwah daging sastra lan drestane, saha sareng nyaksinin upacara lan nyobyahang ring paruman desa tegep rawuhing bisekannyane;
- (3) Krama desa patut ngaturang ayah ring sapamadeg miwah ring panglepasan sang sulinggih riwekas sane katuntun olih prajuru desa;

- (4) Sang sulanggih patut ngariyinan ngayomin pamargin upacara yajnya ring wawidangan desa adat Banjarsayan, sasampun punika wawu kengin muputang yajnya ring dura desa utawi jagat sane tiosan;
- (5) Krama desa patut sareng nitenin sane katuntun olih prajuru desa mangda sahanan yajnya sane kamargiang kapaica pamuput olih sang sulanggih;

SARGAH PATPAT

SUKERTHA TATA PAWONGAN

Palet 1

Indik Krama

Pawos 25

- (1) Sane kabawos krama desa inggih punika satunggil warga sane jumenek ring wawidangan desa tur pastika ilikitan nyane;
- (2) Krama desa manut papalihannyane kepah dados 3 (tiga) luire :
 - ha. Krama Adat inggih punika krama sane nyarengin adat, magama Hindu saha sampun marabian, tedun mabanjar adat, mipil ring banjar adat miwah sareng nyungkemin kahyangan tiga tur sutindih ring Desa Adat Banjarsayan;
 - na. Krama Tamiu inggih punika krama sane mawit saking dura desa adat Banjarsayan, sane magama Hindu, nenten mipil ring banjar adat sakemawos nyungkemin kahyangan tiga lan nganutin dresta miwah uger-uger sane manggeh ring Desa Adat Banjarsayan;
 - ca. Tamiu inggih punika warga utawi kulawarga sane nenten magama Hindu, jumenek ring wawidangan desa adat Banjarsayan lan wantah sareng nyungkemin ring widang pawongan lan palemahan desa adat saha satinut ring uger-uger lan tatiwak desa adat Banjarsayan sane mapakilitan ring tata pawongan lan tata palemahan;

- (3) Manut ring linggihnyane krama desa adat Banjarsayan kabina-
yang makadi ring sor :
- ha. Krama ngarep inggih punika krama sane nyarengin adat,
ngalinggihin karang ayahan desa utawi karang tiosan,
sampun marabian, mipil ring banjar adat, nyungkemin
kahyangan tiga desa adat miwah sutindih ring sahanan
kawredhyan desa adat Banjarsayan;
 - na. Krama Pangele inggih punika krama utawi warga sane
sampun marabian sane magama Hindu tur magenah ring
karang pangarep;
 - ca. Krama Panyade inggih punika krama sane mawit saking
desa adat Banjarsayan matilar dados krama desa adat
tiosan sakemawon waris ipun kantun ring desa adat
Banjarsayan, salantur ipun mawali malih makrama adat
ring desa adat Banjarsayan;
 - ra. Krama Daha Truna inggih punika inggih punika krama
sane mayusa 15 (limolas) ngantos 30 (tigangdasa) warsa
sane durung marabian;
 - ka. Krama Datu inggih punika krama sane mayusa lintangan
ring 30 (tigangdasa) warsa ngantos lampus nenten
naenin ngamargiang kramaning alaki-rabi;
- (4) Manut ring kawonganya krama desa adat Banjarsayan kabina-
yang dados kakalih inggih punika:
- ha. Krama sane kantun jangkep sajeroning parabian(lanang-
istri);
 - na. Krama sane katinggalain sangkaning sane lanang utawi
istri lampus sane kabawos *krama balu*;
- (5) Krama Balu inggih punika krama sane katinggalin sangkaning
sane lanang utawi sane istri lampus miwah sangkaning
nyapian;

- (6) Krama Balu ring desa adat Banjarsayan kabinayang makadi ring sor :
- ha. Balu makrambian inggih punika balu sane sampun madruwe pianak, cucu miwah cicit sakemawon durung taler marabian;
 - na. Balu ngempu inggih punika balu sane kantun madruwe pianak kantun alit;
 - ca. Balu ngatung inggih punika balu sane nenten madruwe pianak utawi santana;
 - ra. Balu ngelisting inggih punika balu sane nenten madruwe pianak, artha warisan miwah sameton;

Pawos 26

Tatacaraning ngaranjing dados krama desa makadi ring sor :

- (1) Ngawit dados krama desa makadi ring sor :
 - ha. Mawiwit pawiwahan;
 - na. Sangkaning pinunas ngaraga;
 - ca. Sangkaning ngamong karang desa utawi karang tiosan;
- (2) Panumaya tedun makrama desa :
 - ha. Ngawit saking katebah ring piodalan pura Malanting suang-suang banjar adat;
 - na. Sasampune polih pamutus saking prajuru desa prade sane mawiwit saking pinunas ngaraga;
 - ca. Masengker 6 (nem) sasih sane mawiwit saking pawiwahan
- (3) Sang sane mapikahyun pacang nyarengin madesa adat ring desa adat Banjarsayan sane mawiwit saking tiosan desa, patut keni pacingkreman sane agung alit ipun kasulurang manut pararem;
- (4) Prade wenten krama saking sewosan desa sareng ngaranjing makrama desa adat ring desa adat Banjarsayan patut kadulurin antuk ilikita saking desa adat wiwitan nyane sane tegep lan jangkep;

Pawos 27

- (1) Tatacaraning ngaranjing dados krama tamiu :
- ha. Masadok ring prajuru banjar manut ring pikamkam kadinasan;
 - na. Tinut satuwuk ring pidabdab miwah uger-uger banjar sajeroning ngupadi kasukerthan banjar;
 - ca. Madhana punya sakalilan ipun;
- (2) Tatacaraning ngaranjing dados tamiu :
- ha. Masadok ring prajuru banjar manut ring pikamkam kadinasan;
 - na. Pastika ring sajeroning ilikitan tamiu saha tinut satuwuk ring uger-uger banjar sajeroning ngupadi kasukerthan lan katreptian banjar inucap;
 - ca. Madhana punia sakalilan ipun;

Pawos 28

Tategenan miwah swadharmaning krma desa adat luire :

- (1) Tategenan krama adat luire :
- ha. Krama ngarep keni urunan miwah ayahan mamungkul;
 - na. Krama balu keni ayah miwah papeson makadi ring sor :
 - 1) Tategenan marupa ayahan keni manut pawonganya sakemawon peson-peson keni tegap utawi mamungkul;
 - 2) Balu ngelisting lanang utawi istri keni ayahan manut kawonganya;
 - 3) Balu makrambian sane madruwe putra lanang utawi istri sampun mayusa 17 warsa tur sampun ngaranjing sekaa truna keni ayahan balu;
 - 4) Balu nyapian kadadosang luput papeson nanging keni ayahan manut arah-arahan;

- ca. Krama pangele kenayah-ayahan makadi mararesik ring kahyangan tiga, banjar lan sane tiosan manut ring kawigunan;
- (2) Krama desa adat kadadosang :
- ha. Mapuankid utawi tan tedun ngayah luire:
- 1) Ritatkala mapawangunan makadi makarya dasar (nasarin), ngerabin sanggah, piasan, palinggih, bale miwah sakancannyane;
 - 2) Ritatkala mayajnya makadi ngotonin, piodalan, nyakapang, masangih, mapasaksi, kicalan putra miwah sakancannyane;
 - 3) Maluasan utawi ngaluang;
 - 4) Matepetin sungkan manut kabuatan;
 - 5) Kacuntakan prade mapakilitan ring ayah kasucian;
- na. Nyada mapiteges wusan ngayah risampun mayusa warsa tur sampun madruwe pangentos ayah utawi sane ngentosin;
- ca. Mogpog utawi ngetut ayahan antuk artha brana sane agung alitnyane manut pararem;
- ra. Panyeledihi, panyade sane pacang nyuksukin ayahan patut sang sane sampun mayusa sanistane 17 warsa tur sampun marabian;
- (3) Swadharmaning krama adat inggih punika:
- ha. Satinut ring sadigingin awig-awig, pararem lan pasuara desa adat;
- na. Tan maren sareng mautsaha mangda desane prasida nyujur pamikukuh lan patitis desane sane sampun kamanggehang;
- ca. Sayaga sareng nitenin katreptian lan kasukertan desa adat;
- ra. Sutindih ring kawerdian desa adat;

- ka. Nginggilang tata prawrettine madesa adat manut ring kasuksman dharmaning agama lan dharmaning nagara;
 - da. Keni paturunan, peson-peson lan ayahan mamungkul;
- (4) Swadharmaning krama tamiu inggih punika :
- ha. Satinut ring tatiwak desa adat sane mapakilitan ring indik ngupadi katreptian lan kasukerthan desa adat sakala niskala;
 - na. Tan kengin nungkasin kerti yasan desa adat;
 - ca. Patut masadok ring Kelian Banjar ritatkala nrima tamiu ngantos lintanganring 24 jam;
 - ra. Ngaturang punia lan ayahan ring kahyangan suci manut kabuatan;
- (5) Swadharmaning tamiu inggih punika :
- ha. Satinut ring tatiwak desa adat miwah kadinasan sane mapakilitan ring katreptian lan kasukerthan pawongan miwah palemahan;
 - na. Tan kengin nungkasin kerti yasan desa adat;
 - ca. Patut masadok ring Kelian Banjar ritatkala nrima tamiu ngantos lintangan ring 24 jam;
 - ra. Ngaturang punia manut kabuatan;

Pawos 29

Kapatutan krama adat, krama tamiu lan tamiu :

- (1) Kapatutan krama adat makadi ring sor :
- ha. Polih pasayuban saking desa;
 - na. Polih kasukertan miwah kasucian dewek, parhyangan lan karangnyane;
 - ca. Polih kasukerthan padruwenyane suang-suang;
 - ra. Ngamedalang pikahyun ritatkala wenten paruman ring desa sane mabuat;

- ka. Dados prajuru ring banjar utawi ring desa;
 - da. Polih pamutus saking prajuru ritatkala wenten wicara;
 - ta. Polih leluputan manut pararem;
- (2) Kapatutan krama tamiu :
- ha. Patut nyungkemin kasutreptian banjar utawi desa adat madasar antuk yasa kerti sane mabuat;
 - na. Polih pasayuban marupa pitulung rikanjekan katiben pancabhaya;
 - ca. Polih pamutus saking prajuru ritatkala wenten wicara;
- (3) Kapatutan tamiu makadi ring sor :
- ha. Patut tinut satuwuk ring uger-uger banjar lan desa adat;
 - na. Patut polih pasayuban marupa pitulung prade katiben pancabhaya;
 - ca. Polih pamutus saking prajuru ritatkala wenten wicara;
- (4) Silih sinunggil krama desa, krama tamiu lan tamiu nenten kadadosang ngajak wong wadon tuna susila (wong istri jalir) ngaranjing, marerepan miwah madunungan ring wawidangan desa adat Banjarsayan, sapisira ugi sane mamurug keni pamidanda manut pararem;
- (5) Krama adat, krama tamiu miwah tamiu nenten kadadosang makta, madruwe, nganggen lan nyobyahang sahananing sarana sane nenten kapatutang olih sang maraga guru wisesa, minakadinnyane obat-obatan terlarang utawi narkoba, sapisira ugi sane mamurug keni pamidanda manut pararem;

Pawos 30

Wusan dados krama desa adat;

- (1) Mararian dados krama desa adat sangkaning :
- ha. Lampus;

na. Pinunas ngaraga;

ca. Kanorayang malarapan piwal ring awig-awig miwah pararem desa utawi mamurug ring pituduh prajuru sajeroning indik nyupat sikian minakadi nenten prasida ngesehin salah maprawretti;

- (2) Sang sane wusan dados krama desa adat taler kabawos wusan mabanjar adat, mangda sampunang kabawos nginutin makadi sasonggan baline inggih punika empak ngulanting, duaning ayah-ayahan makrama adat nguwub ring sajeroning sakala niskala;
- (3) Sang sane wusan makrama desa adat nenten polih pah-pahan padruwen desa miwah pasewakan adat tur nenten polih malih pasayuban sajeroning ala-ayu;
- (4) Sang sane kanorayang saking desa adat dados malih tedun makrama desa adat yaning sampun prasida nginutin sulur adat lan sampun prasida maseh salah prawrettin nyane malarapan katrima ring banjar adat saha kadulurin antuk pamogpog sane kamanggehang manut pararem;
- (5) Prade sangkaning rahayu patilare saking desa adat, polih likita patilar saking prajuru adat;
- (6) Pananjung batu sane manggeh ring desa adat Banjarsayan makadi ring sor :
Ha. Pananjung batu katiba ring :
 - 1) warga desa sane ngawitin tedun makrama banjar adat;
 - 2) warga desa utawi krama desa adat Banjarsayan sane wusan makrama adat pungkuran mawali malih tedun makrama desa adat Banjarsayan;
- (7) Parindikan agung alit pananjung batu sane kakenaning kamanggehang manut pararem banjar suang-suang;

Ayah- ayahan Krama

- (1) Satunggil krama manut pactangannyane keni ayah-ayahan makadi ring sor :
 - ha. Ayahan utama inggih punika ayahan sane kalaksanayang olih krama sane ngamargiang swadharmaning ekajati miwah dwijati;
 - na. ayahan ngarep inggih punika ayahan sane kalaksanayang olih krama sane dados krama adat, sane jangkep alaki rabi. Ayahan ngarep mapiteges paturunan, peson-peson miwah ayahan mamungkul;
 - ca. Ayahan balu inggih punika ayahan sane kalaksanayang olih krama balu makadi :
 - 1) Balu makramabian keni ayahan manut kawonganya sakemawon padagingan mepek utawi tegep;
 - 2) Balu ngempu keni ayahan miwah urunan aparo;
 - 3) Balu ngatung tan keni ayah nanging keni urunan aparo;
 - 4) Balu ngalisting luput manuk;
 - ra. Ayahan daha truna luput ring papeson nanging keni ayahan gotong royong manut kabuatan;
- (2) Suang-suang ayahan punika wantah kamargiang siki kemanten manut kawentenan krama inucap;
- (3) Sahananing krama sane sampun munggah daha truna, suang-suang patut tedun ngayah sane kawastaning ayahan daha truna;
- (4) Ayahan daha truna punika kapupulang ring sajeroning Sekaa Truna;
- (5) Sekaa truna punika patut wenten ring suang-suang banjar adat;
- (6) Krama banjar wenang nyada ayahan sane mateges mademang ayahan yaning sampun pastika kawentenan nyane makadi :

- ha. Sungkan tahunan;
 - na. Yaning sampun madruwe pangentos utawi panyeledihi prade yusane manggeh kagentosin;
 - ca. Risampun mayusa langkungan ring 65 warsa;
- (7) Krama desa adat kadadosang :
- ha. Mapuankid utawi nenten tedun ngayah utawi parum :
 - 1) Rikala nangun yajnya miwah kaluwasan masengker dewasa;
 - 2) Keni dadawuhan saking guru wisesa;
 - 3) Kapialang luire sungkan, matepetin sungkan, kalayu sekaran, kacuntakan prade karya adat ring kahyangan desa, miwah sakancannyane sane kapitawang miwah kasudiang prajuru;

Pawos 32

Tata titi krama desa adat, krama tamiu miwah tamiu nampi krama tamiu miwah tamiu :

- (1) Krama desa adat, krama tamiu lan tamiu sane nampi krama tamiu miwah tamiu rawuh marerepan :
 - ha. Mangda masadok ring Kelian Banjar arahina ngawit marerepan ring genah sang narima (24 jam);
 - na. Yaning krama tamiu utawi tamiu punika madunungan rawuh asasih, kelian banjar patut nitenin nureksa kabuatan nyane madunungan, kadungang ring ilikita sane ninasang kabuatan ipune;
- (2) Yaning kabuatan ipune nenten manut ring ilikita sane ninasang, kelian banjar wenang ngawaliang krama tamiu utawi tamiu inucap kawiwitannyane;
- (3) Yaning krama tamiu utawi tamiu inucap jenek madunungan rawuh nem sasih durung kasadokang, krama sane nampi keni pamidanda manut pararem;

Palet 2

Pamucuk Desa

Pawos 33

Sane kamanggehang pinaka pamucuk ring desa adat Banjarsayan inggih punika :

- (1) Sabha Desa;
- (2) Kertha Desa;
- (3) Prajuru Desa;

Pawos 34

Sabha Desa

- (1) Sabha desa inggih punika paruman desa sane taler kabawos paruman agung desa adat sane kamiletin antuk krama maka sami miwah prajuru adat sami sane matatujon pacang nepasin sahananing wicara sane mawiwit saking awig-awig lan sane mapakilitan ring tata adat, agama, budaya miwah sahananing pidabdab pawangunan ring desa adat sane muatang pamutus ring sajeroning paruman agung;
- (2) Manut ring dresta sane manggeh ring adat, sahananing pamutus-pamutus sane kamedalang tur kamanggehang ring desa adat dumogi pangalaksanan adat-istiadat prasida mamargi ajeg patut kaputusan ring sajeroning paruman desa sane mawasta sabha desa;
- (3) Sabha desa wantah pinaka murdhaning pamutus sajeroning panglaksanan adat-istiadat ring desa adat Banjarsayan;

Pawos 35

Kertha Desa

- (1) Kertha desa inggih punika genah prajuru desa lan krama desa adat nunas dharmaning tatimbang prade wenten nepasin awig-awig;
- (2) Swadharmaning kertha desa wenang *mapaica saluiring dharma* tatimbang ring prajuru adat miwah krama desa adat sane dagingnyane makadi :
 - ha. Indik prajuru desa sane singsal ngamargiang awig-awig;
 - na. Indik krama desa sane pacang nguwah-nguwuhin awig-awig desa adat;
 - ca. Indik wenten wicara krama ring desa adat Banjarsayan sane kasinanggeh perkara;
- (3) Kertha desa patut ngicenin dharma tatimbang lan ngawantu prajuru lan krama desa yaning kacunduk ring pikobet napkala ngamargiang awig-awig;

Pawos 36

Tatacara Ngadegang Kertha Desa

- (1) Kertha desa makwehnyane adiri ngantos tigang diri manut kabuatannyane;
- (2) Sane dados kadegang pinaka kertha desa patut :
 - ha. Mawiwit saking krama desa adat;
 - na. Wikan ring hukum adat, Agama Hindu miwah hukum sane tiosan sane wenten ring jagate;
 - ca. Madruwe kahuripan sane becik lan nenten cacad angga pramana.pamekasnyane susatya ring desa adat;
 - ra. Ritatkala kacawis mayusa sakirang nyane 40 warsa tur sampun marabian;
 - ka. Kasudi olih prajuru suwen nyane dados kertha desa 5 warsa tur sasampune kengin kasudi malih;

Pawos 37

Prajuru Desa

- (1) Sane kasinanggeh prajuru desa inggih punika :
 - ha. Bandesa adat;
 - na. Patajuh pinaka wakil;
 - ca. Penyarikan pinaka juru tulis utawi sekretaris;
 - ra. Patengen pinaka juru raksa;
 - ka. Kasinoman pinaka juru arah;
 - da. Pasayahan pinaka pangabih utawi pawantu;

- (2) Sane dados kadegang prajuru makadi ring sor :
 - ha. Mawiwit saking krama ngarep utawi krama adat;
 - na. Waras lan nenten cacad angga pramana;
 - ca. Maparilaksana becik lan nenten cacad hukum;
 - ra. Jujur, pradnyan, wicaksana lan madruwe pangunadika lascarya ngayah;

Pawos 38

Tatacara Ngadegang Prajuru Desa

- (1) Tatacara ngadegang prajuru sane kamargiang ring desa adat Banjarsayan makadi ring sor :
 - ha. Suang-suang banjar kengin ngamedalang siki calon sane mawiwit saking krama adat:

 - na. Ngadegang prawartaka pamilihan sane kamanggalaning antuk prajuru desa sane lawas tur kawantu olih kelian utawi prajuru banjar sane kasudi;

- ca. Calon sane mawiwit saking suang-suang banjar patut kaselehing olih prawartaka pamilihan, raris kapastika wenten 2 jantos 3 calon bandesa;
- ra. Pamilihan kamargiang ring wantilan utawi genah sane kasungkemin olih prawartaka pamilihan;
- ka. Babakalan utawi calon sane kacawis paling makweh sane jayanti pinaka Bandesa Adat;
- da. Indik ngamanggehang pangabih bandesa adat wenten kalih pamargi luire :
 - 1) Kapatutang antuk drestane prade pangabih bandesa adat kasudi olih bandesa sane jayanti;
 - 2) Manut kapatutan adat sane sampun mamargi ring sajeroning pacang ngentosin pamucuk utawi prajuru kengin sapisanan kadegang ring pamilihan ngawit saking bandesa adat rawuh kapangabih nyane;
- (2) Prajuru desa kamanggehang suwenyane 5 (lima) warsa saha sasampune puputing sengker kengin kadegang malih manut pikarsan krama nenten langkungan ring 2 (kalih) paletan;
- (3) Prajuru sane wawu kamanggehang patut kaupasaksiang sakala niskala ring Pura Desa lan kapikukuhang olih Majelis Madya saha ilikita pamikukuh;
- (4) Prade bandesa adat mararian sadurung panumayan ipun, swadharman nyane kamargiang olih patajuh nyane jantos puputing sengker;

Pawos 39

- (1) Ritatkala ngamargiang kasukerthan desa adat, bandesa adat kawantu olih :
 - ha. Patajuh pinaka wakil;
 - na. Penyarikan pinaka juru surat;
 - ca. Patengen pinaka juru raksa utawi pangamong druwen desa adat;

- ra. Para kelian banjar adat sane ngenter banjar adat;
 - ka. Kasinoman pinaka juru arah;
 - da. Pecalang sane nreptiang desa adat ritatkala wenten karya adat, budaya lan agama Hindu;
 - ta. Pamong utawi prajuru sane wenten ring suang-suang pura panyiwian desa utawi banjar;
- (2) Ritatkala ngenterang kasukerthan ring niskala bandesa patut masinggihang pamangku kahyangan tiga miwah kahyangan desa tiosan;
- (3) Indik tata titi ngadegang pecalang, swadharma lan patitis ipun kamanggehang manut pararem;

Pawos 40

- (1) Swadharmaning Bandesa adat inggih punika :
- ha. Ngenterang paruman-paruman desa adat;
 - na. Ngenterang panglaksanaan daging awig-awig miwah pamutus-pamutus krama desa sane kasinanggeh para rem;
 - ca. Ngaraksa miwah nudonang tata titine migunayang druwen desa;
 - ra. Nuntun saha ngenterang krama desa adat rawuhing warga desa sami ngupadi kasukerthan desa sakala niskala;
 - ka. Nuntun saha nyaksi upacara sangaskaraning kahuripan sane mabuat;
 - da. Nuntun saha ngenterang warga desa nginggilang agama Hindu, kasucian parhyangan, kasucian pawongan, kasucian palemahan miwah tata titine migunayang setra;
 - ta. Mawosin miwah niwakang pamutus marep ring wicara krama;
 - sa. Maka duta desa adat matemuang babawos marep ring sapa sira ugi;

- wa. Nginutin lan nagingin dadawuhan sane mawit saking guru wisesa;
- la. Miwah sane tiosan sane wenten pakilitan nyane ring desa adat;
- (2) Tata titine ngamargiang swadharma inucap ring ajeng, tan maren patut nepek ring daging awig-awig, pararem, dresta miwah pamutus paruman krama desa adat;
- (3) Panglaksanane ring ajeng patut kasobyahang ring desa adat kapungkur ipun;
- (4) Sumakuta miwah sumanggup natak pamutus paruman krama desa adat ngenanin swadharman suang-suang prajuru;

Pawos 41

Swadharmaning Patajuh

Swadharmaning patajuh inggih punika ngawantu bandesa adat ring sajeroning widang parhyangan, pawongan lan palemahan;

Pawos 42

Swadharmaning Penyarikan

Swadharmaning patajuh inggih punika ngawantu bandesa adat nitenin indik sahanan sane mapakilitan ilikita sane marupa administrasi, surat-manyurat maka miwah inventaris desa adat tur nyuratang sakaluring pamutus pangrawos desa sajeroning paruman utawi sangkepan desa;

Pawos 43

Swadharmaning Patengen

Swadharmaning patengen inggih punika ngawantu bandesa adat sajeroning pangrencana paridhana, sakaluring pangranjing miwah pamedal jinah druwen desa adat lan pangupapira padruwen desa adat tegep saha ilikitannyane;

Pawos 44

Swadharmaning Kasinoman

Swadharmaning kasinoman desa adat inggih punika ngawantu bandesa adat sajeroning nyobyahang swalapatra miwah pamutus pangrawos desa majeng ring tempekan miwah warga desa malarapan ngamargiang parah-arang utawi marupa swalapatra lan sarana sane tiosan;

Pawos 45

Swadharmaning Pecalang

Swadharmaning pecalang inggih punika ngawantu bandesa adat sajeroning ngardhi kasutriptian ring desa adat utamanipun napkala ngamargiang upacara yajnya miwah dharmaning agama lan dharmaning nagara;

Pawos 46

Petias utawi paolih-olihan pamucuk utawi dulu desa miwah prajuru desa adat makadi ring sor:

- (1) Luput rerampen utawi peson-peson;
- (2) Polih tanding tengah;
- (3) Upon-upon pacatu, palabha desa sane marupa carik utawi tegalan miwah sane tiosan sane patut;
- (4) Petias tiosan manut pararem;

Pawos 47

- (1) Pamucuk, dulu desa lan prajuru desa kagentosin sangkaning :
 - ha. Lampus;
 - na. Pinunas ngaraga;

- ca. Sampun puputing sengker;
 - ra. Kawusang, kanorayang olih krama desa duaning iwang pamargi, manawi nilar sasana utawi piwal ring awig-awig;
- (2) Ngentosin, nguwusang, nganorayang pamucuk, dulu desa lan prajuru adat patut kamargiang sajeroning paruman agung desa adat;

Palet 3

Indik Kukul

Pawos 48

- (1) Kukul sane wenten ring Desa Adat Banjarsayan inggih punika :
- ha. Kukul Desa;
 - na. Kukul Banjar;
 - ca. Kukul Sekaa-sekaa;
 - ra. Kukul Tempekan Banjar;
- (2) Tabuh tatepakan kukul desa makadi ring sor :
- ha. Atulud banban, keras banban tengeran makarya miwah parum desa utawi banjar:
 - na. Aklentungan pinaka tengeran ngembasang putra;
 - ca. Tigang klentungan pinaka tengeran wenten sane ngamargiang panglayatan utawi ngarorod;
 - ra. Atulud banban pinaka tengeran wenten sane lampus;
 - ka. Bulus mapanjang pinaka tengeran bhaya katunuan;
 - da. Bulus kenceng kawewehin tatabuhan kadi ring sor :

- 1) Bulus kenceng atulud pinaka tengeran kahanan bhaya kacolongan/kamalingan, dusta katetehan (karubuhan), kehilangan warga, anyud (kalebok ring toya, ngamuk-kamuk, miwah saluiring bhaya sane sewosan;
 - 2) Bulus kenceng kalih tulud pinaka tengeran bhayane maweweh-weweh rahatnyane;
 - 3) Bulus kenceng tigang tulud pinaka tengeran indik bhayane sampun mangetang utawi mabhayapati;
- (3) Risampune puput patatulunge saking krama patut wenten pangawali, suaran kulkule banban tadah mapanjang atulud, pamekas ring tatengeran indik bhaya;
 - (4) Kulkul desa miwah kulkul banjar tan wenang katepak yaning tan sangkaning pituduh prajuru desa sajawaning tengeran kapanca bhayan;
 - (5) Sang nepak tan sangkaning pituduh prajuru patut digelis masadok maka buatan panepake, prade mamurug patut kadanda manut pararem;
 - (6) Kulkul sekaa samaliha kulkul pondokan tan kalugra nyawerin sukat miwah tengeran kulkul desa/banjar, prade mamurug patut keni pamidanda manut pararem;
 - (7) Kulkul paumahan tan wenang katepak yaning tan wenten pancabhaya, prade mamurug patut kadanda manut pararem;

Palet 4

Indik Paruman

Pawos 49

- (1) Paruman utawi sangkepan ring Desa Adat Banjarsayan wenten:

- ha. Paruman krama banjar adat kawentenang nyabran ngasasih tanpa arah-arah duaning sampun manggeh kamargiang ngasasih apisan sane katengerin antuk suaran kulkul;
 - na. Paruman desa adat kamargiang nyabran ngawarsa, taler kengin kamargiang padgata kala manut kabuatan manawi wentendadawuhan saking guru wisesa;
 - ca. Paruman prajuru desa kamargiang manut wiguna;
 - ra. Paruman sekaa-sekaa kalaksanayang manut kabuatan nyane;
- (2) Paruman desa adat utawi banjar adat madudonan makadi ring sor :
- ha. Prasida lumaksana risampun katedunin antuk sang patut ngamiletin paruman, kamanggala antuk tengeran kulkul miwah mabusana adat saha tan kalugra makta parabot utawi gagawan lan tan maren patut ngarcana Ida Bhagawan Penyarikan maka sarana widhi widhana cane;
 - na. pangawit paruman kalaksanayang sep-sepan saha riwusan nyacah krama kamargiang panawuran dadosan agung alit ipun kamanggehang manut pararem;
 - ca. Ring sajeroning paruman tan kalugra ngawetuang suara ghora utawi byuta, prade wenten makadi punika keni pamidanda sane marupa biapacamil makadi dandaning nguman-uman ring sabha;
 - ra. Pamutus babawos briuk sapanggul utawi ingkup punika sane kamanggehang;
- (3) Prade daging paruman tan kacumponin mangda prajuru desa utawi banjar ngilikang babawos saha pamutusnyane mangda kararemang antuk krama desa/banjar, samaliha prade tan prasida kasungkemin rawuh ping tiga, prajuru banjar/desa kengin nunas pamatut ring Kertha Desa, sasampune patut ngundag pamargine makadi kapretama manggeh pinaka paingkupan prajuru, raris para sepuh utawi panglingsir desa lan ping untat manggeh pinaka pamutus paruman;

- (4) Sajeroning paruman desa, Bandesa Adat patut nyobyahang pamargi ngenterang adat, pamekas indik :
- ha. Munjuk lungsuring pakraman saha ayah-ayahnyane, sulur artha brana padruwen desa miwah sakancannyane;
 - na. Pangrencana prajuru sane mapakilitan ring usaha desa kapungkur;
 - ca. Parindikan pawangunan sane sampun kalaksanayang, pantaraning mamargi pakaryane miwah sane pacang kapidabdabin pungkuran;
- (5) Pamutus paruman desa sane kasinanggeh pararem maka pamitegep pamargin awig-awig;

Pawos 50

- (1) Paruman prajuru desa kawenangang ngarincikang usaha desa kapungkur;
- (2) Paruman prajuru desa nenten kadadosang ngamedalang tategenan krama sadurung kasungkemin ring paruman krama desa;
- (3) Pamutus paruman prajuru ngawetuang pasuara sane mawiwit saking sang maraga guru wisesa lan kangkat kaonekang ring sajeroning pararem desa;

Palet 5

Indik Padruwen Desa

Pawos 51

- (1) Padruwen Desa Adat Banjarsayan makadi ring sor :
- ha. Kahyangan desa luire :
 - 1) Kahyangan tiga (Pura Desa, Pura Puseh, Pura Dalem);
 - 2) Pura Prajapati sane magenah ring suang-suang setra;
 - 3) Pura Malanting sane magenah ring suang-suang banjar;

- 4) Pura Malanting Pasar Taru Mas;
- 5) Pura Dalem Surya;
- 6) Pura Batan Bingin;
- 7) Patapakan Rtu Bagus;
- 8) Pura Dalem Alit;
- 9) Pura Dawuh Pasar Binong;
- 10) Pura Puseh Sakti;
- 11) Pura Bukit;
- 12) Pura Luhur Nangun Sakti;
- 13) Pura Panti;
- 14) Pura Matahun;
- 15) Pura Dalem Sari;
- 16) Pura Beji Taman Sari;

- na. Wantilan Desa Adat Banjarsayan miwah Pasar;
- ca. Pasar Desa Adat Banjarsayan;
- ra. Palemahan pura kahyangan desa adat Banjarsayan;
- ka. Labha pura miwah labha desa adat Banjarsayan sane kamanggehang manut pararem;

- da. Karang ayahan desa;
- ta. Setra desa adat Banjarsayan sane magenah ring suang-suang banjar;

- sa. Sahananing tatangguran makadi Gong, Klentangan, Balaganjur miwah sakancannyane;
- wa. Sahananing pralingga Ida Bhatara, Pratima, Bhusana pura, uperenggan pura miwah sakancannyane;
- la. LPD (Lembaga Perkreditan Desa) Desa Adat Banjarsayan;

- ma. Niasa, sasanti miwah sane lianan;
- (2) Satunggil padruwen desa patut pastika kawentenan nyane saha tegep madruwe ilikita sanistane wenten pangling-elingnyane;
- (3) Opih-olihan Desa Adat makadi ring sor :
- ha. Pikolih saking pamupon labha pura;
 - na. Urunan krama;
 - ca. Wantuan saking guru wisesa.
 - ra. Dhana punia tiosan sane patut;

Pawos 52

- (1) Prajuru desa wenang ngetangang pamupon labha pura miwah druwen desa;
- (2) Pikolih lan pamupon nyane patut kanggen pangaci pura lan pawangunan ring pura;
- (3) Nyabran paruman desa, prajur pangraksa padruwen desa ngawentenang piuning ring saparindikan minjuk lungsurin padruwen desa;
- (4) Salwiring druwen desa patut wenten ilikitannyane;
- (5) Nenten kadadosang ngadol utawi ngesahang padruwen desa yan tan kasungkemin antuk krama desa;

Palet 6

Indik Panyanggran Banjar

Pawos 53

- (1) Krama desa adat Banjarsayan rikala ngawentenang karya adat makadi pitra yajnya, manusa yajnya miwah sane tiosan patut kasanggra olih banjar;

- (2) Prade ngawangun karya pitra yajnya miwah manusa yajnya, panyanggran banjar inucap mangda kanutang ring sang madruwe yajnya utawi sang sane mapinunas;
- (3) Pangromba karya ngantos langkungan ring ping tiga patut katuran pangu;
- (4) Pangu sane katur rikala karya pitra yajnya utawi manusa yajnya miwah karya sakaluirnyane, mangda kanutang ring kawentenang sang madruwe karya utawi sakasidannyane;
- (5) Napkala karya kalayu sekaran utawi bah-bangun krama banjar sajeroning panyanggrannyane patut ngamargiang dharmaning matatulang tur nenten ngetangang pangu;

Palet 7

Indik Pawiwahan

Pawos 54

- (1) Pawiwahan inggih punika patemoning purusa kalawan pradhana malarapan antuk panunggalan kahyun suka citta sane kadulurun antuk upasaksi sakala lan niskala;
- (2) Indik pamargin pawiwahan makadi ring sor :
 - ha. Papadikan sane kamanggala antuk pakrunan;
 - na. Ngarorod, ngarangkat rihin wawu kakrunayang;
 - ca. Nyeburin utawi nyantana sane matesges pradhana mawak purusa;
- (3) Pidabdab sang pacang ngamargiang pawiwahan patut :
 - ha. Sampun manggeh daha truna (nginutin Undang Undang Perkawinan);
 - na. Sangkaning pada rena (suka- cita);
 - ca. Patut kasudiang prade pangambilane tios agama;
- (4) Pamargin pawiwahane mangda kasaksiang sakala niskala pamekas saksi sakala sane marupa prajuru adat, pungkuran pacang ngilikitayang sajeroning administrasi adat tur prasida ngamolihang akta perkawinan manut uger-uger guru wisesa;

- (5) Pawiwahan sane kapatutang ring Desa Adat Banjarsayan makadi ring sor :
- ha. Sampun kamargiang pabyakalan saha upasaksi sakala niskala;
 - na. Wenten upasaksi prajuru sane makelingang sajeroning ilikita adat saha sampun matengeran kulkul adat;
 - ca. Nenten sangkaning papaksan;

Pawos 55

Pangambilan miwah sanggama sane tan kapatutang kamargiang ring sajeroning kahuripan makadi ring sor :

- (1) Pangambilan sane ngimpasin sulur kamanusan sane manggeh ring nagara krama makadi:
- ha. Pangambilan nginutin Raksasa wiwaha doyan marikosa;
 - na. Gamia-gamana inggih punika parabian sareng sameton sidet utawi tunggal rah, makadi meme, bapa, pianak miwah sakancannyane;
 - ca. Salah krama utawi salah timpah, masanggama sareng buron utawi sato;
 - ra. Baduwasa inggih punika masanggama sane papatehan makadi lanang paturu lanang, wadon paturu wadon;
- (2) Prade wenten jadma malaksana makadi punika patut kapalasan tur keni pamidanda manut pararem saha ngalaksanayang pamarisudha ring palemahan desa adat sane kamargiang ring pura Bale Agung manut patitis agama;
- (3) Pawiwahan prade silih sinunggil tan rawuh napkala subadewasane nepek kamargiang santukan wenten pawilangan sios, kengin pawiwahane lumaksana prade sampun wenten pamasatika sane kasungkemin antuk sang ngamargiang pawiwahan (lanang utawi wadon) sane kaupasaksi olih prajuru adat -

lan pamargine ngangge caciren marupa busana sang mawiwaha utawi sarana siosan manut dresta lan ilikitannyane pungkuran tetep ring sang ngalaksanayang pawiwahan inggina parinaman nyane;

Pawos 56

Pawiwahan sane kasinanggeh patut utawi sah manggeh ring desa adat Banjarsayan makadi ring sor :

- (1) Kalaksanayang madasar upacara pawiwahan jangkep saha upasaksi makadi :
 - ha. Dewa saksi maka cihna wenten upacara katur ring Ida Sanghyang Widhi Wasa;
 - na. Bhuta saksi inggih punika upacara sane katur ring para bhuta kala;
 - ca. Manusa saksi inggih punika sahananing upacara pawiwahan sane kamargiang kaupasaksi olih kulawarga miwah prajuru desa miwah banjar saha puput kailikitayang prajuru sane ngamongin indik ilikita adat miwah dinas;
- (2) Upacara pawiwahan sane kamargiang mabantang antuk catur dresta pamekas manut ring patitis agama Hindu lan nenten dados lempas ring uger-uger sane kamanggehang olih guru wisesa sane mapakilitan ring Undang-Undang Perkawinan miwah Undang-Undang Kependudukan;

Pawos 57

Tatacara ngamargiang pawiwahan makadi ring sor :

- (1) Silih sinunggil krama desa adat Banjarsayan sane pacang ngamargiang mapawarangan patut masadok ring prajuru desa utawi prajuru banjar;
- (2) Upacara pawiwahan manut dresta panglaksanaan nyane wenten 3 (tiga) soroh luih ipun :
 - ha. Tatacara nginutin papadikan;

- na. Tatacara nginutin pangrorodan;
 - ca. Tatacara nyeburin utawi nyantana;
- (3) Pawiwahan nginutin tatacara papadikan makadi ring sor :
- ha. Pakrunan utawi papinangan kamargiang ping tiga saha malarapan sarana :
 - 1) Kapratama malarapan canang saha runtutania;
 - 2) Masarana canang lan sajeng saha runtutania;
 - 3) Kaping tiga antuk pamargi mapamit ring kamulan wadone saha majauman dening tipatbantali;
- na. Makasami pamargin upacara inucap mangda kanutang ring catur dresta sane manggeh ring desa adat Banjarsayan pamekas ring patitis niskala tur nepek ring sastra agama Hindu;
 - ca. Risampune puput sapula-pali indik pamargin upacara inucap raris wadone kabuat sareng budal kapakubon lanange;
 - ra. Risampune rawuh ring pakubon lanange patut kalanturang ngamargiang pawiwahan rawuh puput ngaranjing sajeroning ilikita banjar adat utawi desa adat;
- (4) Prade kamargiang dharmaning ngarorod patut nginutin :
- ha. Reraman lanange ngawentenang pamalaku marupa pasedek antuk duta saksi kalih diri sane kangganing olih kelian dinas/prajuru dinas saha pamargine masiliban ngarereh dawuh pangatep rahinane sareng wengine masarana sasuluh utawi sundih;
 - na. Pagenahan wadone (antene) nenten kadadosang ring pakubon sang lanang (patut kakebang rihin) sadurung pacang kalaksanayang upacara pabyakala;

- ca. Upacara salantur ipun pateh makadi ring tatacara papadikan utawi papinangan;
- (5) Upacara pawiwahan mapiteges upacara tinas apadang (tinglas) mapikuren, duaning manut makadi ring sor kucapang :
- ha. Sajeroning kabawos ambe kalaksanayang ring sakala niskala antuk sarana widhi widhana miwah upacara jajauman;
- 1) Jajauman pinaka ngambe mateges ngadungang kahyun sang kalih inggih punika kulawarga wadon sareng kulawarga lanange;
 - 2) Widhi widhana pinaka upasaksi niskala nunas sang wadon ring kamulan nyane;
- na. Sajeroning bawos kerabkambe laksanane ring sakala :
- 1) Antuk panyaksi krama banjar miwah pakulawarga tiosan duaning wantah kakerabin antuk tengeran suaran kulkul;
 - 2) Pamekas upasaksi prajuru sane pungkuran pacang ngilikitayang ring panagara krama;

Pawos 58

Asu Mundung Alangkahi Karang Hulu

Indik pawilangan dresta sane mapakilitan ring parikrama asu mundung lan alangkahi karang hulu nenten kabawosang sajeroning adat Banjarsayan, sakemawon prade silih sinunggil krama kanton pacang ngamanggehang pamargine puniki utawi prade wenten pikahyun pacang ngalaksanayang upacara mapatiwangi pacang kasanggra olih Desa Adat Banjarsayan saha panglaksanaan nyane kasuksara ring banjar suang-suang miwah nenten kapialangin;

Pawos 59

Pianak Buncing

Prade wenten jadma istri mobot raris ngamedalang pianak kembar lanang istri, pawilangan nyane makadi ring sor :

- (1) Prade rarene embas saha ari-ari asiki kawastanin mawak tunggal;
- (2) Prade maka kalih ngamong ari-ari punika kabawos manut ring pawedalan suang-suang utawi mawak suang-suang;
- (3) Yan prade pada ngamong ari-ari nanging embasnyane maheletan sawiji taler tunggal wastannyane;
- (4) Prade rarene lekad utawi embas sadina padha ngamong ari-ari, sane istri dumunan lan sane lanang pungkuran, kawastanin buncing, manut dresta kabawos ngaletihin gumi, indik puniki patut kawentenang panyapsap pakarangan sane katangganing olih sang sane madruwe parikrama utawi sang madruwe putra, prade embas putrane sane lanang dumunan lan sane istri pungkuran, punika nenten ngaletihin gumi, tur sang madruwe putra patut ngastungkara antuk upacara dapetan sang rare lan mapatawang kulagotra saha pranamya sawentene;
- (5) Indik pamargine ring desa adat nenten pacang kategesang sane mapakilitan ring kawentenan sang madruwe parikrama sakemawon mangda satata nepek ring kasuksman niskala sane madasar antuk pikahyun lila lan lascarya;

Palet 8

Indik Santana

Pawos 60

- (1) Santana manut dresta wenten kalih soroh inggih punika prasantana miwah santana paperasan;

- (2) Santana paperasan inggih punika santana sane mawiwit saking idih-idihan sane kategepin antuk upacara yajnya miwah upasaksi sakala niskala;
- (3) Prade paperasan punika manggeh ring sajeroning pawiwahan kabawos pawiwahan nyeburin duaning sang pradhana mawak purusa;
- (4) Pratisantana inggih punika santana sane mawetu sangkaning pawiwahan sane kapatut;
- (5) Prade sajeroning pawiwahan sane nenten kapatutang ngawetu-ang santana, mangda nenten kantun kawastanin pianak babinjat utawi astra patut kamanggala antuk panyangaskara;
- (6) Santana rajeg inggih punika pratisantana wadon (pradhana) sane kamanggehang lanang (purusa) tur risampun ngalaksana- yang pawiwahan nyeburin;
- (7) Santana rajeg inucap mawiwit sangkaning :
 - ha. Pratisantana wadon tunggal utawi silih sinunggil prati- santana wadon yaning makasami pawetuan nyane wadon;
 - na. Sampun kamanggehang dados pratisantana (purusa);
 - ca. Kapawiwahan kaceburin, kautsahayang jadma sane magama Hindu utawi jadma tios agama sane sampun ngalaksanayang upacara sudi wadhani;
 - ra. Sane kamanggehang pinaka santana rajeg patut masadok ring prajuru adat tur kasobyahang ring paruman krama adat;

Pawos 61

- (1) Sapasira ugi krama adat sane pacang madruwe pangrancana ngangkat santana patut masadok ring prajuru adat sanistane asasih sadurung kamargiang upacara pamerasan;
- (2) Ngangkat santana patut satinut ring dudonan pamargi sane sampun kamanggehang ring desa adat Banjarsayan;

- (3) Prajuru adat utawi Bandesa adat sane kaangganing olih Kelian Banjar adat patut nyobyahang ring banjar adat utamannyane majeng ring pakulawarga sane pacang ngangkat santana, manawi sajeroning paperasan punika wenten silih sinunggil sameton sane tan lila majeng pangangkatane punika, masenger kalih wuku mangda sampun masadok ring prajuru, dumogi prasida kaicenin pamutus olih prajuru adat sajeroning sida tan sidane kamargiang pamerasan;
- (4) Upacara pamerasan prasida lumaksana prade nenten kasantulin olih wicara sane mapakilitan ring catur dresta miwah sang pacang ngamargiang pamerasan;
- (5) Prade sulur pamerasan nenten manut ring tata titi sane manggeh ring desa adat Banjarsayan, prajuru adat wenang ngandeg sang pacang ngamargiang pamerasan, saha ngicenin tuntunan mangda kapuputang rihin wicara sane nyantulin tur masasahan rihin sajeroning babawosan mangda nemugelang lan pada saling sungkemin mawastu gilik saguluk pacang ngamargiang pamerasan;
- (6) Paperasan sane patut tur manut ring dresta desa adat Banjarsayan makadi ring sor :
 - ha. Manggeh kamargiang widhi widhana paperasan;
 - na. Kaupasaksi olih prajuru adat sane makelingang lan ngilikitayang;
 - ca. Kasobyahang ring wawidangan banjar miwah desa adat;
 - ra. Polih pamutus saking sang rumawos sane marupa ilikita pengangkatan santana
- (7) Sane patut kaperas pinaka santana paperasan makadi ring sor:
 - ha. Jadma sane magama Hindu;
 - na. Kautamayang sane mawiwit saking waris pancer kapurusan;

- ca. Kulawarga saking purusa, prade tan wenten kengin saking wadon, prade taler tan wenten kengin saking paprenahan, sami tan wenten wenang sakama-kama sane magama Hindu;
 - ra. Kengin taler mapawilangan ring jadma sane tunggal sanggah, marajan, paibon manawi tunggal dadya utawi anak tios sane magama Hindu;
- (8) Kengin ngangkat santana lintangan ring adiri lanang wiadin wadon;

Palet 9

Indik Nyapian

Pawos 62

- (1) Mapikuren prasida wusan malarapan antuk palas marabian utawi silih sinunggil lampus;
- (2) Parabiane puceh sangkaning silih sinunggil lampus kawastanin balu, makadi balu lanang utawi balu istri;
- (3) Palas marabian sangkaning mawiwit wicara kawastanin nyapian;
- (4) Sang pacang ayat palas marabian patut atur supeksa indik pailikitannyane rihin ring sang rumawos (Pengadilan Negeri) wastu tinas apadang pamutusnyane sane kabawos nyapian, salanturnyane prajuru adat nyobyahang ring banjar adat kawentenan nyane saha keni pamidanda pangentos suaran kulkul manut pararem;

Pawos 63

- (1) Tatacara palas marabian makadi ring sor :
 - ha. Nawur prabia pasaksi sami matenga;
 - na. Pagunakaya polih pahan pateh utawi pada;
 - ca. Pabekel tatadan suang-suang kakuasa niri-niri lan warisan kakuasa olih sang sane manggeh purusa;

- ra. Ngaweruhin lan ngupajiwa pratisantana manut ring swadharmaning guru rupaka;
 - ka. Nawur pamidanda pangentos suaran kulkul manut pararem;
 - da. Ngelung jinah bolong miwah masamsam beras kuning sajeroning upacara sane kamargiang ring pura Bale Agung maka cihna palas marabian;
- (2) Prade riwekas sang palas marabian kacihna adung malih, patut:
- ha. Ngamargiang pawiwahan malih manut tatacaraning pawiwahan;
 - na. Kadanda nikel saking palase marabian;

Pawos 64

- (1) Wusan mapikuren sangkaning silih sinunggil lampus kawastanin balu;
- (2) Sang balu kabinayang dados kalih soroh, luire:
 - ha. Balu luh wit santana (santana rajeg) miwah balu luh boya santana;
 - na. Balu lanang kapurusa (wit santana) kapurusa miwah balu lanang nyeburin (boya santana nyeburin);
- (3) Swadharmaning balu makadi ring sor :
 - ha. Ngamanggehang patibrata lan tan kengin ngamargiang paradara miwah dratikrama;
 - na. Nguwasayang waris pagunakaya, nenten kadadosang ngadol, ngadayang, makidihang lan sakancannyane sawaning sampun polih wak-wakan saking pianak utawi kulawarga pinih tampek saking kulawarga purusa prade putrane kantun alit-alit;
 - ca. Kengin ngidih santana prade wenten pidabddan sadurung silih sinunggil lampus saha sampun polih pasungkeman saking kulawarga purusa;

- ra. Kawenangang mawiwaha malih yaning sampun kalugra
olih pianak miwah kulawarga purusa;
- (4) Balu kaucap tan pageh prade :
 - ha. Dratikrama miwah paradara;
 - na. Matilar saking pakubon tan pasadok ngantos lintangan
ring 6 (nem) sasih;
 - ca. Mamurug ring sasana miwah swadharmaning balu
makadi nenten prasida ngesein solah maprawretti
marep ring pituduh kulawarga purusa;

Pawos 65

Anaking Stri Lanji

- (1) Prade wenten jadma istri mobot utawi beling nenten wenten
sane ngangkenin bobotane taler nenten nahenin ngamargiang
widhi widhana, raris medal/embas rare punika, kawastanin
anaking stri lanji utawi pianak babinjat miwah astra;
- (2) Prade wenten wicara makadi punika mangda kautsahayang
olih kulawarganya makadi ring sor :
 - ha. Mangda sampunang kantung ngamong kacuntakan miwah
kantung kamanggehang pinaka pianak babinjat, rare
punika patut digelis wenten sane ngangkat utawi
mameras saha biyangnyane kaprayascitta;
 - na. Prade nenten wenten sane mameras ngangge pianak,
wenang biyang kalih pianaknyane kaprayascitta manut
sastra agama;
 - ca. Rikalaning ngamargiang pamerasan miwah pamrayascitta
mangda saha upasaksi prajuru banjar utawi prajuru
desa;

- (3) Prade wenten pawilangan jadma makadi ring ajeng (pawos 63, angka 1 lan 2) sadurung kamargiang upacara pamrayascittan utawi pamerasan, rare kalih biyangnyane nenten kadadosang ngaranjing kakahyangan desa (kahyangan suci), prade mamurug jadma punika keni pamidanda agung alit manut pararem saha mrayascita kahyangan inucap;

Palet 10

Indik Warisan

Pawos 66

- (1) Warisan inggih punika artha brana saha ayah-ayahan ngupadi kasukerthan sakala niskala sane mawit saking kaluhuranya arep ring katurunanya;
- (2) Karang kasinanggeh warisan luire :
- ha. Druwe tengah makadi tegalan, sawah, kahyangan, pasuka siwa karang lan sane tiosan;
 - na. Pagunakaya, tatadan utawi jiwadhana, utang-piutang;
- (3) Wawu kengin kabawos warisan prade :
- ha. Wenten sane mapiturun (pawaris);
 - na. Wenten katurunan (ahli waris);
 - ca. Tatamian sane marupa brana, ayah-ayahan, swadharma miwah sane siosan maka cihna warisan;

Pawos 67

- (1) Sane kabawos ahli waris makadi ring sor :
- ha. Pratisantana purusa;
 - na. Pratisantana (santana rajeg);
 - ca. Santana paperasan lanang wiadin wadon;

- (2) Prade tan wenten sakadi ring ajeng (pawos 67, (1), ha, na, ca) kengin sane kasinanggeh ahli waris makadi ring sor :
- ha. Turunan purusa prenah ngamungganghang makadi rerama lanang, pekak, kumpi lan salantur nyane;
 - na. Turunan purusa prenah kasamping makadi kaponakan, misan, mindon lan sakancannyane;
- (3) Swadharmaning ahli waris luih ipun :
- ha. Narima saha ngutsahayang tatamian pahan leluhurnyane makadi ngempon sanggah, marajan, paibon, panti, dadia lan salanturnyane;
 - na. Ngupakara pawaris risampune lampus lantur muputang ring sajeroning pitra yajnya;
 - ca. Nawurin utang-piutang pawaris ngantos buntas katawur;
 - ra. Ngupapira warisan manut ring swadharmaning ahli waris;

Pawos 68

Indik waris kawaris ring sajeroning desa adat kamargiang makadi ring sor :

- (1) Risampune kamargiang upacara pitra yajnya miwah utang-piutang pawaris buntas katawur, wawu warisan prasida kepah;
 - (2) Ahli waris sami polih pahan sangkaning waris pagunakaya, sajawaning karang utawi tegal ayahan desa kamong olih ahli waris sane kasinanggeh krama ngarep;
- (3) Silih sinunggil ahli waris kengin tan polih pahan prade :
- ha. Nilar kawitan miwah sasananing agama;
 - na. Alpaka guru rupaka;
 - ca. Santana rajeg kesah mawiwaha;

- ra. Santana nyeburin ninggal kadaton;
 - ka. Pratisantana miwah santana nyeburin ngalurug kasuker-
than ring pakulawarganya miwah ring desa adat;
- (4) Sane boya ahli waris kengin muponin warisan manut dudonan makadi ring sor:
- ha. Santana wadon sane durung kesah mawiwaha;
 - na. Balu luh wiadin lanang nyeburin (suang-suang boya santana);
- (5) Pawaris kengin maweweh rikala kantun maurip sane pinaka jiwadhana utawi pabekel, maka cihna paweweh sane ajeg marek ring putrane kesah mawiwaha;

Pawos 69

- (1) Prade ring sajeroning pakulawargan wenten ahli waris langkungan ring adiri, parikramannyane patut:
- ha. Kawentenang paigum indik pedum waris inucap;
 - na. Patut kamargiang dharmaning ngandap kasor prade mapakilitan ring karang desa;
 - ca. Prade sajeroning babawosan tan prasida ingkup patut katunasang ring prajuru adat, manawi rawuh ring sang rumawos;
- (2) Prade karang inucap kaputungan, prajuru desa patut nibakang majeng ring :
- ha. Ahli waris sang sane jenek rihinan;
 - na. Sang sane kengin kanggen santana utawi kangkat pinaka santana manut pawos 60;
 - ca. Prade sajeroning nibakang pamutus nenten kapanggih ring pakilitan waris, wenang katibakang ring krama tiosan sakemawon patut nedunin makrama adat ngarep;

- (3) Prade jantos karang desa utawi karang ayahan desa kasepih utawi kepah, sane nanggap karang inucap suang-suang patut nedunin makrama desa ngarep;
- (4) Warisan sane tan dados sepih, kepah utawi kadol makadi ring sor :
- ha. Wawidangan genah suci makadi sanggah, marajan, panti, dadya miwah sakancannyane;
 - na. Druwe tengah utawi labha pura sajawaning sampun madasar paingkupan panyungsung utawi paetangan tios sane sampun kasungkemin olih kramannyane;
 - ca. Pustaka utawi mole-mole kahyangan makadi keris, tombak, pralinggan Ida Bhatara miwah sakancannyane;
- (5) Prade wenten jadmata utawi silih sinunggil krama ring desa nenten prasida nyantenang waris, raris pungkuranipun lampus, kalaning desa adat ngamargiang panyapuh jagat, sang lampus punika patut kaupapira olih banjar adat utawi desa adat, sakemawon warisan nyane sane marupa karang, tegal, carik miwah sane tiosan karaksa olih banjar utawi desa;
- (6) Prade wenten karang kaputungan, wenang prajuru adat mawosin makadi ring sor:
- ha. Nureksa sulur pakulawargan nyane manut silsilah utawi sila-sila;
 - na. Prade sampun manut waris punika gumanti wit saking purusa, saking wadon utawi paprenahan ngunggahang, kasamping miwah sane tiosan, prajuru patut nibakang waris;
 - ca. Prade tan manut, karang inucap patut kabancut tur katibakang ring krama banjar utawi desa manut pararem;
- (7) Prade boya waris rajeg kengin taler muponin warisan manut dudonan :
- ha. Santana wadon sane durung mawiwaha;

- na. Santana wadon sane madruwe pianak menten pastika bapannyane, wantah ngawaris sangkaning pagunakaya kewanten;
- ca. Balu muani sane nyeburin;
- ra. Mulih daha utawi mulih truna riantukan pawiwahane pecak kabewos ninggal kadaton sajawaning maduluran jiwadhana utawi dana tatadan.

(S) Pawaris kengin mapaweweh rikalaning maurip sane marupa :

- ha. Jiwadhana utawi pabekel tatadan pinaka dhana paweweh sane patut kakuasayang olih pianak sane kesah mawiwaha;
- na. Pagunajiwa paweweh padgatakala maka paduraksa ring pawaris sane mateses muponin pikolih kemanten;
- ca. Pedum pamong miwah pedum raksa sane mawiwit pagunakaya sane pungkuran pacang dados pedum jenek (hak milik)patut kadulurin antuk ilikitapinaka bhukti padruwe;

SARGAH LIMA

SUKERTHA TATA PALEMAHAN

Palet 1

Indik Karang, Tegal, Carik lan Setra

Pawos 70

- (1) Krama adat sane ngamong karang paumahan, panegalan patut ngawentenang wates sane pastika, kengin marupa tembok, miwah pagehan;

- (2) Karang, panegalan miwah carik kapatutang mangda magaleng kadulu utawi kaluwanan, teges ipun magaleng kaler utawi kangin tur sane patut ngardi wates sane magenah ring tebenan (badelodan utawi badawuhan);
- (3) Yaning wenten karang desa kepah dados kakalih utawi langkungan suang-suang sane nanggap pahan saha sane ngawentenang pamedalan patut nedunin makrama adat saha dados krama ngarep;
- (4) Wates sane kakardinin kawenangan ngangge pagehan, tembok utawi pal saking BPN;
- (5) Prade wenten karang kabebeng patut kautsahayang wenten margi sane kamanggala antuk prajuru;
- (6) Prade wenten karang kaputungan wenang prajuru nibakang ring warsnyane utawi ring krama adat tiosan sane magama Hindu;
- (7) Karang desa. Karang paumahan, carik lan panegalan patut kaupapira sakala niskala lan manut sastra agama Hindu;
- (8) Setra wawidangan desa adat pastika watesnyane;
- (9) Setra desa adat Banjarsayan wantah setra krama desa adat sane magama Hindu;
- (10) Indik tata titi migunayang setra patut masadok ring prajuru adat;

Pawos 71

- (1) Tan wenang ngalah-alah karang, tegal, carik miwah karang palemahan sane kasinanggeh suci makadi palemahan pura, setra lan sapanunggilan ipun;
- (2) Tan wenang ngembahan toya sane mawit saking toyan hujan, toyan badan wawalungan (limbah ternak), toya wit paciringan utawi genah pasiraman (kamar mandi), toyan puwaregan (limbah dapur) miwah sane tiosan kapakarangan tios, kamargi pamekas sane sida pacang ngardinin pakeweh ring kahuripan utawi sane sida ngusak-asik kawerdian kahuripan (kesehatan) miwah kasrian wawidangan desa adat;

- (3) Nenten dados ngutang utawi ngentungang laluwu, wangken wawalungan lan sapanunggilan ipun, tawulaning jadma, sepungan setra, kapakarangan tios, tegal, carik pamekas kagenah sane kasinanggeh suci;
- (4) Tan wenang nunjel, nanem sawa yadiastun sawa karesian, ring karang, tegal, carik lan sakancannyane;
- (5) Silih sinunggil krama sane mamurug utawi ngalurug makadi pawos ring ajeng (pawos 71, 1, 2, 3, 4) keni pamidanda manut pararem saha mrayascitta genah manut pararem;

Palet 2

Indik Setra

Pawos 72

- (1) Setra wawidangan desa adat Banjarsayan pastika watesnyane;
- (2) Setra desa adat inggih punika wantah setra krama desa adat Banjarsayan sane magama Hindu;
- (3) Indik tata titi migunayang setra patut masadok ring prajuru adat;
- (4) Nenten kapatutang makarya undung-undung utawu rumah kubur sane permanen ring palemahan setra desa adat Banjarsayan;
- (5) Krama desa Banjarsayan sane mawit saking dura desa adat Banjarsayan prade mapikahyun pacang migunayang setra desa adat Banjarsayan patut masadok ring prajuru adat tur polih pamutus saking prajuru desa adat;
- (6) Makasami wicara sane mapakilitan ring tatacara migunayang setra desa adat Banjarsayan pamutusnyane kamanggehang olih Bandesa Adat sasampune polih tatimbang olih prajuru desa adat miwah panglingsir desa sane kasinanggeh kertha desa (sane mapakilitan ring krama dura desa);

Palet 3

Papayonan

Pawos 73

- (1) Ngawit nandur papayonan sane marupa tanem tuwuh patut adepa agung ngajerowang saking wates, prade jantos ngaliwatin wates wenang kasepat gantungin;
- (2) Yaning wenten tatanduran ngungkulin kapisaga, samaliha katarka pacang mayanin patut kawara malarapan paiguman dumogi pingajeng sang nruwenang wit prasida ngarebah utawi notor tatanduran inucap;
- (3) Prade risampun kawara taler nenten wenten usaha sang nruwenang wit, sang rumasa katetehan utawi kajerihan wenang masadok ring prajuru tur sasampune kaparitas kalugra ngicalang wit inucap sakewanten patin tatanduran inucap patut katawur manut panglokikan sang nepasin;
- (4) Sang keni pamidanda panyangaskara saha prabia manut pararem arep ring wawangunan sang karubuhan makadi ring sor:
 - ha. Sang nruwenang wit sinanggeh mayanin, prade pungkat ngarubuhin wawangunan krama tios;
 - na. Sang notor (mongol) utawi ngarebah taru utawi tatanduran tur nepenin krama tios;
- (5) Krama desa adat Banjarsayan patut ngutsahayang kawerdian tanem tuwuh, sane prasida ngardi desane asri miwah lestari;

Palet 4

Wawangunan

Pawos 74

- (1) Wawangunan ring wawidangan desa adat Banjarsayan patut nginutin :

- ha. Nenten dados ngalintangin wates;
 - na. Nenten dados nyayubin kapisaga, bilih-bilih tembokne wenten ring sajeroning wates;
 - ca. Ngangge gaguwat Asta Bhumi miwah gagulak Asta Kosala-Kosali sanistane manut ring patitis niskala;
- (2) Prade wawangunan jantos nyayubin kapisaga, bilih-bilih temboke ring telengin wates, risampun kawara lan kasadokang ring prajuru, wenang kadanda manut pararem saha tembok inucap kagubar utawi sanistane mangda kakaryanang abangan;
- (3) Sapasira ugi krama desa adat Banjarsayan sane jagi ngawangunan paumahan atep ring panyandinge sane durung pastika watesnyane, wenang kawentenang paiguman pinih rihin ring panyandinge saha kasaksinin olih prajuru, pinaka upasaksi pamutus bawos ring wates;

Palet 5

Indik Wawalungan

Pawos 75

- (1) Sahanan warga desa sane mamiara wawalungan makadi bawi, sampi, wedus miwah sakancannyane risampun mabelas utawi sampun masaluk tali patut sayaga nitenin negul, nglogor mangda nenten ngarusakin karang utawi pabyanan krama tios, bilih-bilih ngantos ngaranjing tur ngaletihin kahyangan suci;
- (2) Prade wenten wawalungan malumbar utawi ngeleb tur ngarusakin, karang, pabyanan krama tios, risampun kawara wawalungan inucap kengin kataban tur kadanda ngawaliang wit sane karusak saha nawur panebas papiaran manut panglokikan prajuru desa;

- (3) Prade jantos ngaletihin kahyangan suci makadi sanggah, marajan, pura lan sapanunggilan ipun, risampun kaparitatas olih prajuru, wenang sang nruwenang wawalungan punika kadanda manut pararem saha mrayascitta genah suci inucap manut pararem;
- (4) Krama desa adat Banjarsayan patut nyarayanin sahanan wawalungan miwah sarwa prani, nenten kapatutang maboros paksi miwah nuba ulam miwah siosan punika;
- (5) Prade wenten wawalungan sane kataban mawastu padem tan sangkaning gumanti tur saha saksi sang naban punika patut luput saking kaiwangan;
- (6) Prade wenten krama desa sane mamiara asu bilih-bilih punika asu wit sangkaning ras, patut sayaga nitenin maksin asu inucap, mangda sampunang jantos ngawinang biapara makadi pinungkan rabies, manut ring gaguat lan babuat guru wisesa;

Pawos 76

Tatacaraning Naban

- (1) Sang naban patut wenten sakirang-kirang ipun kalih diri tur wenang wawalungane punika kategul utawi kadedehan, kasawenin antuk tatanduran sane karusak saha pramangkin wawalungane punika kabakta ring prajuru desa;
- (2) Yaning wenten wawalungan kataban jantos sadina (24 jam), nenten wenten sane ngangkenin patut wawalungane punika kasuksara ring desa;
- (3) Salami wawalungane punika kataban magenah ring prajuru desa, patut kapiara kawehin teda tur kawilangin indik pangargan tatedan punika olih prajuru;
- (4) Sang sane nruwenang wawalungan punika sajawaning kadanda patut nawur pangargan tatedan salami kataban;

Pawos 77

- (1) Paolih-olihan tatabanan kepah tiga makadi ring sor :
 - ha. Apah siki katiba ring prajuru;
 - na. Apah siki katiba ring sang nruwenang pabyanan;
 - ca. apah siki katiba ring banjar utawi desa;

- (2) Sajawaning paolih-olihan ring ajeng, sang nruwenang sane karusak patut polih pangargan tatanduran sane karusak utawi kateda olih wawalungan sane kataban;

Palet 5

Karesikan Desa Adat

Pawos 78

- (1) Mararesik ring sajeroning palemahan kahyangan tiga lan pura prajapati miwah setra desa adat Banjarsayan kalaksanayang olih krama desa adat Banjarsayan nyabran ngasasih ping kalih manut dadawuhan tengeran suaran kulkul desa sakewanten inggian pararesikan ring palinggih kahyangan kamargiang olih pamangku lan juru sapuh kahyangan inucap;

- (2) Mararesik ring sajeroning palemahan desa adat Banjarsayan manut dresta kalaksanayang olih banjar sawidangan desa adat Banjarsayan saha dudonan ipun kasuksara ring banjar suang-suang;

- (3) Ring sajeroning nitenin karesikan desa adat miwah banjar adat lan genah-genah sane inggil ring sajeroning palemahan desa adat Banjarsayan katitenin taler olih pianak banjar sane wenten ring sajeronin pakilitan sekaa truna makadi pakaryan gotong royong miwah sakancannyane;

- (4) Indik karesikan ring sajeroning telajakan pasiwa karang kasuksara ring sang sane ngalinggihin karang inucap;
- (5) Nenten kadadosang ngawangun genah ibadah tiosan ring krama sane magama Hindu prade durung pastika indik ilikitan nyane;
- (6) Yaning wenten pacang ngawangun genah ibadah tiosan ring krama Hindu ring wawidangan desa adat Banjarsayan patut polih wak-wakan saking prajuru desa sane marupa ijin rekomendasi desa adat;

SARGAH NEMNEM

WICARA, BHAYA, DUSTA LAN PAMIDANDA

Palet 1

Indik Wicara

Pawos 79

- (1) Sane wenang mawosin makadi mutusang wicara ring sajeroning desa adat inggih punika prajuru desa sane madudonan makadi ring sor :
 - ha. Kelian banjar adat pinaka panua prade wicara punika sajeroning patunggilan banjar;
 - na. Bandesa adat/Kelian desa adat pinaka panua prade wicarane punika patunggilan desa;
- (2) Bandesa adat/Kelian desa adat/Kelian banjar adat mawosin wicara patut kasanggra antuk krama desa/banjar sakirang-kirang ipun kalih diri pinaka pangabih miwah saksi;
- (3) Panyanggra ring ajeng kasudi olih Bandesa adat/Kelian desa/Kelian banjar adat saha kautsahayang prajuru dinas makadi perbekel utawi kepala dusun;

- (4) Dudonan mawosin saha muputang wicara warga desa kadi ring sor :
- ha. Kaping ajeng kabawosin olih Kelian Banjar;
 - na. Tan cumpu ring panepas kelian banjar kalanturang ring panglingsir banjar;
 - ca. Paruman banjar nenten katinutin patut katumusang ring Bandesa adat;
 - ra. Bandesa adat nenten prasida muputang wicara, patut katincapang ring kertha desa;
 - ka. Pamatut kertha desa nenten kacumponin, patut kasuksara ring paruman desa sane kasinanggeh wasana-ning pamutus;
 - da. Prade pamutus paruman desa nenten kacumponin wenang katunasang ring sang rumawos makadi Majelis Alit, Majelis Madya, Majelis Utama miwah Pengadilan Negeri;
- (5) Sahanan wicara sane mawiwit kacorahan miwah sakalwire sane nungkasin daging awig-awig, pasuara miwah pararem desa/banjar, patut digelis kabawosin tur nenten nyantosang pasadok;
- (6) Sajaba wicara makadi ring ajeng patut nyantosang pasadok sang nunas babawos;
- (7) Panepase patut pastika nyantenang iwang patut madasar antuk tri pramana (saksi, bhukti, ilikita) miwah tan maren mucuk ring catur dresta;

Palet 2

Indik Bhaya lan Dusta

Pawos 80

- (1) Indik bhaya sane lumbrah nibenin ring kahuripan sane kabawos panca bhaya luire :

- ha. Jiwabhaya inggih punika indik kapatian sane mawit sangkaning kabiseka, kabaak, kaamuk lan sakancan nyane;
- na. Arthabhaya inggih punika kamalingan, kapandangan, kicalan artha sane marupa jinah utawi mole-mole siosan;
- ca. Toyabhaya utawi erbhaya makadi blabur agung, toyan sagara munggah kanusagara miwah sakancan nyane;
- ra. Stribhaya inggih punika bancana sane nibenin wong pawestri makadi kaplagandang, kaparikosa, miwah sakancan nyane;
- ka. Duracara ring agama makadi kicalan pratima utawi pralingga Ida Bhatara, arca miwah sarana lan upa-renggan pura makadi busana genah suci, jinah bolong ring genah suci lan sapanunggilan ipun;

(2) Bhaya-bhaya sane tiosan makadi :

- ha. Genibhaya utawi katunuan, kapuwunan lan sakancan nyane;
- na. Karipubhaya inggih punika bhaya sane mawetu sangkaning laksanakan ripu mawastu makweh sane kabayaran lan mangemasin pati rawuh kagenah kahuripannyane miwah artha branan ipun;
- ca. Jagat kageringan sangkaning palalindon (lindhu) matemahan kasangsaran kahuripane;
- ra. Jagat katibenin marana makadi bhaya mutah baya utawi mawabah utawi manular;

- (3) Sang manggihin kahanan jiwabhaya patut digelis nyuarayang kulkul bulus manut ring tengeran kulkul jiwabhaya tur krama sami patut nedunin suaran kulkul punika saha mapitulung gumentos bhayane prasida katangganing miwah kapuputang manut dudonan pamuputnyane miwah kapatutannyane;

- (4) Sang manggihin kahanan arthabhaya patut nyuarayang kulkul manut makadi suaran kulkul arthabhaya saha katedunin antuk pikahyun mapitulung dumogi bhayane gelis prasida kapuputang tur sang malaksana prasida katibakin pamutus manut kapatutan sang dados bromocorah;
- (5) Parindikan bhaya sane nibenin genah-genah sane inggil makadi genah suci patut kapuputang sakala niskala;
- (6) Sang manggihin kahanan genibhaya patut digelis nyuarayang kulkul manut ring suaran kulkul genibhaya tur krama patut nedunin saha makta sarana sane mawiguna ring kawentenan genibhaya punika gumentos katunuan utawi kapuwunan punika digelis genine prasida kapademang;
- (7) Sang malaksana duracara ring agama panepasnyane mangda kasulurang ring catur dresta miwah nepek ring kasuksman tri pramana (saksi, bhukti lan ilikita) saha wenang sang malaksana punika kadanda manut pararem tur kadulurin antuk masapuh-sapuh ring genah suci inucap;
- (8) Yan wenten jadma malaksana mamaling saha mararusakan ring genah kamalingin, patut jadma punika kadanda manut pararem saha ngawaliang rarusakannyane kajatimula;
- (9) Prade sang malaksana utawi sane ngardi bhaya punika kaputus olih sang rumawos, pakenan danda ring adat dadosnyane luput sakemawon danda panyangaskara kamargiang makadi patut (nenten dados luput);
- (10) Prade wenten jadma ngaranjingin pakubon utawi pakarangan krama tios rikala suwung, mawastu sang madruwe pakubon utawi pakarangan punika kamalingan utawi kaicalan, wenang jadma punika katuwekang antuk madewa saksi ring pura Bale Agung, sumangdane nenten katuwekang wicarane, asing-asing ngaranjingin pakubon utawi pakarangan krama tios sane suwung patut :

- ha. Matengeran suara utawi makawukan;
- na. Nyantosang sang madruwe pakubon rawuh utawi masa-
dok ring pangapit pinih tampek maka buatan ngarawuhin
pakubon punika;
- ca. Pamedal karangnyane kasawenin maka cihna mapanga-
rah rikala suwung;

Pawos 81

- (1) Sane ngaranjing ring parilaksana dusta ketah kabawos asta
dusta luih ipun :
 - ha. Mamademang jadmata utawi nyayanang ngamademang
anak tios (himsakah);
 - na. Mamarikosa sane madasar pikahyun brangti, bragedegan
bringas, bangras (kroddhakah);
 - ca. Namtamin indriya mawastu tan eling ring raga (bhoktah);
 - ra. Mapitulung pacang makarya bhaya ring anak tios
(sakharakah);
 - ka. Masawitra ring sang malaksana jiwabhaya (prithikara);
 - da. Ngupapira maling (nyaropenin maling);
 - ta. Ngicenin pasayuban ring sang malaksana bromocorah
(sthanadhah);
 - sa. Saruron ring sang malaksana bromocorah utawi sang
malaksana jiwabhaya (sretah);
- (2) Satunggil krama sane uning ring kawentenan dusta ring ajeng
mangda digelis utawi pramangkin masadok ring prajuru desa;

Palet 2

Indik Pamidanda

Pawos 82

- (1) Desa utawi banjar wenang niwakang pamidanda majeng ring
warga desa sane sisip;
- (2) Paniwak inucap kalaksanayang olih bandesa adat utawi kelian
banjar adat;

- (3) Luir pamidanda sane katiwakang ring desa adat Banjarsayan warnan nyane marupa:
- ha. Ayahan kasisipan;
 - na. Danda artha (dadosan, danda saha panikelnyane);
 - ca. Rerampagan;
 - ra. Kasepekan utawi kadawut karangnyane;
 - ka. Panyangaskara;
 - da. Kawaliang pipil kramannyane (kawusang makrama);
- (4) Agung alit pamidanda sane kamargiang manut ring sor singgih kasisipannyane pinih ajeng gumanti muatang kasidan dumogi mangda prasida ngicalang malan desa manut patitis kasuker-thaning pakraman;
- (5) Jinah utawi rajabrana pamidanda patut dados druwen desa utawi banjar;

Pawos 83

- (1) Rikala waneng lan panumaya ngamedalang peson-peson, dadosan, urunan lan sapanunggilan ipun yan sampun lintangan ring sengker sane kasungkemin, patut katikelang pamidandan nyane sane kasungkemin manut pararem;
- (2) Risampune keni panikelan, mawaneng malih kalih sangkepan, durung taler katawur, wenang karampag manut tatacara makadi ring sor:
- ha. Rerampagan kamargiang olih prajuru kasarengin olih kelian banjar saha upasaksi sakng prajuru dinas;
 - na. Sang sane ngamargiang rerampagan patut madasar darsana ngambil sarana utawi barang sane kambil, prade sane karampag marupa tanem tuwuh patut ngangge cihna sawen tur sane karampag kanutang ring utang sang karampag;

- ca. Prajuru adat patut miteketang sumangdane barang utawi sarana tiosan sane karampag masenger siki utawi kalih wuku mangda katebussarana punika, prade langkungan ring panumaya sarana utawi barang inucap pacang kalelang;
- ra. Nenten dados ngarampag padruwen krama sane prasida ngamademang pangupajiwane sang karampag, sahanane barang sane kainggilang ring sajeroning kautaman agama makadi pratima utawi pralinggaan Ida Bhatara, busana genah suci miwah sapanunggilanipun;
- ka. Nenten dados ngarampag sahanane barang sane ngaranjing pinaka prabot paon, makadi payuk, gebeh, pangorengan, talenan lan sakancane prabot sane prasida nyaropenin kahuripan;
- da. Nenten dados ngarampag sahanane prabot kasawah makdi singkal, lampit, tenggala miwah sakancanyane;
- ta. Nenten dados karampag makadi ring sor :
- 1) Bale yanipun madruwe bale wantah abungkul;
 - 2) Pusaka makadi keris, lontar, tombak, bandangan, paying pagut, arca, pratima miwah sakancanyane;
- (3) Prajuru makadi bandesa adat, kelian banjar adat mangda mastikayang sahanane barang sane karampag manut senger sane kasungkemin mangda katebus, prade lintangan ring panumaya barang inucap jagi kadol utawi kalelang;
- (4) Prade sampun lintangan ring panumaya barang rerampagan punika patut kalelang tur prade lelang punika ngamolihan pangarga langkungan ring utang sang karampag patut kawaliang ring sane nruwenang barang;

- (3) Pamutus babawosan mangda kautsahayang mawetu saking pikahyun sane mapituas gilik saguluk sajeroning ngulati kasukerthan;

Pawos 85

- (1) Sakalwiring sane wenten sadurungnyane patut kanutang ring sadagingin awig-awig puniki;
- (2) Sakalwiring sane durung kabawos ring sajeroning awig-awig puniki patut kamargiang manut tatacara sane sampun ketah mamargi kadulurin antuk pararem-pararem;

SARGAH KUTUS

SAMAPTA

Pawos 86

- (1) Awig-awig puniki mawasta Awig-awig Desa Adat Banjarsayan;
- (2) Awig-awig puniki kamargiang sasampun kasungkemin lan kararemin ring dina.....Isaka warsa 1940 Tanggal masehi, pang/ping, sasih, magenah ring
- (3) Awig-awig puniki kalingga tanganin olih prajuru adat lan kasaksinin olih prajuru dinas, Majelis Alit lan Majelis Madya saha kapikukuh olih Bupati murddhaning jagat Badung;
- (4) Lwir sang ngalingga tanganin makadi ring sor :


Prajuru Adat Banjarsayan,



Penyarikan,

Ir. Ngakan Made Ardana, SE. MMA.

Kelian Banjar Adat Binong,



Kelian Banjar Sayan Baleran




Kelian Dusun Sayan Baleran



Kelian Banjar Adat Sayan Delodan,



Kelian Dusun Sayan Delodan



Perbekel Werdi Buwana



Wayan Kardana



I Gst. Ngt. Gd. Jaya Saputa, S.Sos.M.Ap.
NIP. 197502071993111 002.



I Made Widiada, SH.

Majelis Madya Kabupaten Badung,



I Ida Bagus Anom.

Murddha Pamikukuh,



I Bupati Badung,

I Nyoman Giri Prasta.